

Institutes coustumières... [par A. Loisel.]

Loisel / Antoine / 1536-1617 / 0070. Institutes coustumières...
[par A. Loisel.]. 1607.

1/ Les contenus accessibles sur le site Gallica sont pour la plupart des reproductions numériques d'oeuvres tombées dans le domaine public provenant des collections de la BnF. Leur réutilisation s'inscrit dans le cadre de la loi n°78-753 du 17 juillet 1978 :

- La réutilisation non commerciale de ces contenus est libre et gratuite dans le respect de la législation en vigueur et notamment du maintien de la mention de source.
- La réutilisation commerciale de ces contenus est payante et fait l'objet d'une licence. Est entendue par réutilisation commerciale la revente de contenus sous forme de produits élaborés ou de fourniture de service.

[CLIQUER ICI POUR ACCÉDER AUX TARIFS ET À LA LICENCE](#)

2/ Les contenus de Gallica sont la propriété de la BnF au sens de l'article L.2112-1 du code général de la propriété des personnes publiques.

3/ Quelques contenus sont soumis à un régime de réutilisation particulier. Il s'agit :

- des reproductions de documents protégés par un droit d'auteur appartenant à un tiers. Ces documents ne peuvent être réutilisés, sauf dans le cadre de la copie privée, sans l'autorisation préalable du titulaire des droits.
- des reproductions de documents conservés dans les bibliothèques ou autres institutions partenaires. Ceux-ci sont signalés par la mention Source gallica.BnF.fr / Bibliothèque municipale de ... (ou autre partenaire). L'utilisateur est invité à s'informer auprès de ces bibliothèques de leurs conditions de réutilisation.

4/ Gallica constitue une base de données, dont la BnF est le producteur, protégée au sens des articles L341-1 et suivants du code de la propriété intellectuelle.

5/ Les présentes conditions d'utilisation des contenus de Gallica sont régies par la loi française. En cas de réutilisation prévue dans un autre pays, il appartient à chaque utilisateur de vérifier la conformité de son projet avec le droit de ce pays.

6/ L'utilisateur s'engage à respecter les présentes conditions d'utilisation ainsi que la législation en vigueur, notamment en matière de propriété intellectuelle. En cas de non respect de ces dispositions, il est notamment passible d'une amende prévue par la loi du 17 juillet 1978.

7/ Pour obtenir un document de Gallica en haute définition, contacter reutilisationcommerciale@bnf.fr.

INSTITUTES

COUSTUMIERES.

O V

MANVEL

DE PLUSIEURS ET DIVERSES REIGLES

*sentences, & Prouerbes tant anciens que modernes du
Droict Coustumier & plus ordinaire de la France.*



A PARIS,

Chez ABEL L'ANGELIER, au premier pilier
de la grand' Salle du Palais.

M. D C V I I.

AVEC PRIVILEGE DV ROY.

11626

L'IMPRIMEVR AV LECTEUR.

ENcores que ce Liure ne soit point de Maistre Guy Coquille sieur de Romenay, si est-ce que m'ayant esté baillé avec celuy du droit François, l'on a trouué bon de les mettre ensemble, tant pour estre tous deux de mesme subiect, que pource qu'ils pourront seruir de secours, & esclarcissement l'un à l'autre.



TITRES.

I. LIVRE.

| | | |
|---------|--|--------|
| Tit. I. | D es personnes, | pag. 1 |
| II. | De mariage. | 7 |
| III. | De doüaires. | 10 |
| IIII. | De voulrie, mainbournie, bail, garde, tutele & curatele. | 14 |
| V. | De compte. | 16 |

II. LIVRE.

| | | |
|-------|---------------------------------------|----|
| I. | De la qualité & condition des choses. | 17 |
| II. | De seigneurie & iustice. | 19 |
| III. | De seruitudes. | 23 |
| IIII. | De testamens. | 24 |
| V. | De successions & hoiries. | 26 |
| VI. | De partages & rapports. | 29 |

III. LIVRE.

| | | |
|-------|--|----|
| I. | De conuentions. | 30 |
| II. | De mandemens, procureurs, & entremetteurs. | 31 |
| III. | De communauté. | 32 |
| IIII. | De vente. | 34 |
| V. | De retraictz. | 36 |
| VI. | De loüages. | 40 |
| VII. | De gaiges & hipotheques. | 41 |

IIII. LIVRE.

| | | |
|-------|---|----|
| I. | De rentes. | 43 |
| II. | De cens, lots, ventes, terraige & champart. | 49 |
| III. | De fiefs. | 48 |
| IIII. | De donaisons. | 57 |
| V. | De responces. | 58 |
| VI. | De payements. | 58 |

V. LIV. V.

| | |
|--|----|
| I. D'Actions. | 60 |
| II. De Barres & exceptions. | 61 |
| III. De Prescriptions. | 62 |
| IIII. De Possession, Saisine, Complainte de nouvelletre, Sequeste, Recreance & Maintenuë. | 65 |
| V. De Preuves & reproches. | 68 |

VI. LIV.

| | |
|------------------------------------|----|
| I. De Crimes, & Gages de bataille. | 69 |
| II. De Peines & amendes. | 71 |
| III. De Jugements. | 74 |
| IIII. D'Appellations. | 76 |
| V. D'Executions. | 77 |
| VI. De Tailles. | 79 |

NE MEA DONA TIBI FRANCI PER DEVIA
IVRIS
VESTIGATA DIV, PLVRESQVE PROBATA
PER ANNOS,
INTELLECTA PRIVS QVAM SINT CON-
TEMPTA RELINQVAS.

A iij

MEAE DONATI FRANGI PER DEVI
LVS
VERIGATA DIV. PIVRESOV PROBATA
PER ANNOS
INTELLECTA PRIVS QVAM SINT CON
TEMPTA RELINOVAS

A iii



A.E.G.L.A.L.D.B. Tout ainsi que nostre grand
maistre & Docteur commun du droict Romain nous ensei-
gnoit qu'il falloit songneusement aduiser aux reigles &
principes de chacune partie d'iceluy, ainsi ai-je pris peine & plaisir
tout ensemble en le pratiquant avec nostre droict François par l'espace
de quarante ans & plus, de remarquer en nos Coustumes & usage
ce qui auoit apparence de reigle ou sentence: & les assemblant peu à
peu, les arranger en quelque meilleur ordre: esperant que double pro-
fit en aduiendroit. L'un en ce qu'elles pourroient servir & à vous &
à d'autres moins experimentez d'instruction ou Institutes constu-
mieres du droict de la France. L'autre en ce que les plus sçauants
seroient inuitez de communiquer au public, ce qu'ils en ont, ou pour-
ront plus heureusement recueillir. Et qu'apres tant de ramats con-
fus & incertains, l'on ne desdaignera point ceste simplicité d'escrire,
en laquelle nous voyons les deux Scauoles, Nerace, Caie, Papinian,
Paul, Vlpian, Pompon, Martian, Rufin & autres Iurisconsultes
s'estre employez, & le Prince des Medecins acquis un loz Immortel,
se trouuant aussi par fois icy la resolution de quelques oincts des
plus douteus & controuersés. Et par aduenture en aduiendroit-il
un troisieme qui surpasseroit de beaucoup les deux autres. Qui se-
roit que tout ainsi que les prouinces, Duchez, Cötez, & Seigneuries de
ce Royaume regies & gouuernees sous diuerses coustumes, se sont avec
le tēps reugees sous l'obeissance d'un seul Roy, & quasi de sa seule &
unique monnoye; ainsi se pourroient-elles en fin reduire à la confor-
mité, raison, & equité d'une seule loy, coustume, poids & mesure
sous l'auctorité de sa M. Vous pouuant asseurer que la plus-part de ce
qui est icy proiecté, se trouuera extraict de la source & origine du
droict ancien coustumier, & plus ordinaire de ce Royaume, usage &
pratique d'iceluy: n'y ayant apporté que bien peu du mien, avec l'or-
dre & la liaison; dont i'ay appris qu'il faut tousiours auoir grand soin.
Que si vous trouuez quelque obscurité, ou trop grande antiquité en
aucunes de ces reigles; la pratique d'icelles vous les esclaircira de

plus en plus, & monstrea qu'elles seruent grandement à la recog-
noissance de nostre droict François. Comme si quelques vnes d'icel-
les ne semblent, ou en effect ne sont perpetuellement vrayes, souue-
nez-vous qu'il faut du commencement: tenir pour reigle ce qui est
plus uniuersel & general, ores qu'il y ait des exceptions & en effect,
que la premiere reigle de toutes les reigles est celle cy.

NVLE REIGLE SANS FAVTE.



INSTITUTES COUSTUMIERES,

O V

DE PLUSIEVS ET DIVERSES
REIGLES, SENTENCES, ET PROVERBES
du Droit coustumier & plus ordinaire
de la France.

LIVRE PREMIER.

Des personnes. TITRE PREMIER.



VI veut le Roy, si veut la loy.

II.

Au Roy seul appartient de prendre tribut sur les personnes.

III.

Toutes personnes sont franches en ce Royaume, & si tost qu'un esclaue a at-
taint les marches d'iceluy, se faisant baptiser, il est affrâchy.

IIII.

Et sont nobles ou roturiers.

V.

Les roturiers sont bourgeois, ou villains.

VI.

Nobles estoient iadis, non seulement les extraicts de no-

A

blerace en mariage, ou qui auoient esté annoblis par lettres du Roy, ou pourueus d'offices nobles: mais aussi ceux qui tenoient fiefs, & faisoient profession des armes.

VII.

A raison dequoy il n'estoit point permis aux roturiers de tenir fiefs sans congé & permission du Prince.

VIII.

Auiourd'huy toute personne peut tenir fiefs: aussi n'annoblissent-ils point: s'il n'y auoit titre de grande dignité.

IX.

Nul ne peut annoblir que le Roy.

X.

Pauvreté n'est point vice, & ne desannoblit point.

XI.

Longueur de temps n'estaint noblesse ny franchise.

XII.

Les nobles sont proprement subjects du Roy.

XIII.

Les roturiers & vilains sont iusticiables des seigneurs dequels les font couchans & leuans.

XIII.

Sinon qu'il soit question d'heritages qu'ils tiennent ailleurs, ou qu'ils soient Bourgeois du Roy.

XV.

Droict de bourgeoisie s'acquiert par demeure par an & iour, ou par adueu és lieux où il y a droict de parcours & entrecours.

XVI.

Par quelques coustumes la verge annoblit, & le ventre affranchit.

XVII.

Naturellement les enfans nez hors mariage suiuent la condition de la mere.

XVIII.

En mariage legitime ils suiuent la condition du pere.

XIX.

Et en formariage, le pire emporte le bon.

XX.

L'adueu emportoit l'homme, & estoit iusticiable de corps & de chastel où il couchoit & leuoit: mais par l'ordonnance du Roy Charles IX. les delicts sont punis où ils sont commis.

XXI.

Le vilain ou roturier estoit semond du matin au soir, ou du soir au matin: Au noble, il falloit huiétaine.

XXII.

Moult plus est tenu le franc homme à son seigneur par l'hommage & honneur qu'il luy doit, quen'est le vilain pour ses rentes payant.

XXIII.

Car vilain ne sçait que valent esperons.

XXIII.

Et oignez vilain il vous poindra: Poignez vilain, il vous oindra.

XXV.

Sergent à Roy est pair à Comte.

XXVI.

Le sous-aagé n'a ny voix ny respons à Court.

XXVII.

Femmes ont voix à respons en Court, & si reçoient mises & arbitrages.

XXVIII.

Comme femme franche est annoblie par son mary, mesmes pendant son veufuage, aussi femme noble est faite roturiere par son mary.

XXIX.

Droict de puissance paternelle n'a lieu.

XXX.

Feu & leu font mancipation ce dict Brassas: & enfans mariez, sont tenus pour hors de pain & pot, c'est à dire emancipez.

XXXI.

Enfans de famille, & femmes mariees sont tenuës pour auctorisez de leurs peres & maris en ce qui est du faict des

marchandises dont ils s'entremettent au fceu de leurs peres & maris.

XXXII.

Enfans nais avant le mariage, mis fous le poille font legitimez.

XXXIII.

Quelques coustumes dient qu'un bastard, depuis qu'il est nay est entendu hors de pain : mais l'on iuge que qui fait l'enfant le doit nourrir.

XXXIII.

Bastards peuuent acquerir & disposer de leurs biens, tant entre vifs, que par testament.

XXXV.

Maistre Martin Doublé, tenoit que bastards ne pouvoiēt recevoir laigs de pere, ny de mere: Ce qui se doit entendre de laigs excedant leur nourriture.

XXXVI.

Bastard aduoüé, retient le nom & la noblesse de la maison de son pere, avec les armes d'icelle barrees.

XXXVII.

Bastards ne succedent point ores qu'ils soient legitimez, si ce n'est du consentement de ceux qui y ont interest.

XXXVIII.

Aussi personne ne leur succede, sinon leurs enfans nez en loyal mariage.

XXXIX.

En defaut d'enfans, leur succession appartient au Roy, ou aux seigneurs hauts iusticiers en la terre desquels ils sont nez, domiciliez, & decedés.

XL.

En dispence de bastard ceste condition est tousiours entendue s'il est né de femme franche.

XLI.

Aubains sont estrangers qui sont venus s'habiter en ce

Royaume, ou qui en estans natifs s'en sont volontairement eestranges.

XLII.

Aubains ne peuuent succeder ny tester que iusques à cinq sols, & pour le remede de leurs ames.

XLIII.

Bien peuuent-ils acquerir & disposer de leurs biens entre vifs.

XLIII.

S'ils ne laissent des enfans nés, & demeurans au Royaume, ou d'autres parens naturalisez & y demeurans, le Roy leur succede.

XLV.

Et non autres seigneurs, s'ils n'y sont fondez en titre, & permission expresse du Roy.

XLVI.

Aubains ne peuuent tenir offices, ny benefices, fermes du Roy, n'y de l'Eglise.

XLVII.

Le tout s'ils ne sont naturalisez par lettres du Roy verifiées en la chambre des Comptes.

XLVIII.

Gens d'Eglise, de communauté & morte-main peuuent acquerir au fief seigneurie, & censive d'autrui : mais ils s'ont cōtraignables d'en vuider leurs mains dās l'an & iour du commandement à eux faict apres l'exhibition de leur contract.

XLIX

Après l'an ils n'y peuuent estre contraincts, mais sont tenus en payer indemnité au seigneur & prendre admortissement du Roy.

L.

Nul ne peut admortir que le Roy.

LI.

L'admortissement de ce qui est tenu immédiatement du Roy, s'estime coustumierement à la valeur du tiers de la chose.

LII.

Ce qui est tenu mediatement d'autrui ne s'estime pas tant, d'autant qu'outre ce, il faut payer l'indemnité au seigneur.

LIII.

Le droit d'indemnité du seigneur s'estime au tiers, cinquiesme, ou sixiesme de la valeur de la chose censuelle.

LIII.

Car quant à ce qui est tenu en fief, il en faut bailler homme vivant & mourant, voire confisquant au seigneur haut iusticier.

LV.

Par la mort duquel estant tousiours deu plain rachapt, il est estimé indemniser le seigneur feudal des droits de ventes qui luy eussent peu estre deus.

LVI.

Droit d'indemnité est personel, & n'est deu qu'une seule fois.

LVII.

Ce qui est deuëment & du tout amorty, ne doit aucune charge feudale ny censuelle: mais est tenu bailler sa declaration.

LVIII.

Iamais chien ne mordit l'Eglise qu'il n'enragea.

LIX.

Il y a des fiefs & main-mortes de corps & de meubles, & autres d'heritages.

LX.

Le serf ne succede point au franc, ny le franc au serf.

LXI.

Auant qu'un serf manumis par son seigneur soit franc, il faut qu'il paye finance au Roy.

LXII.

Serfs ou main-mortables ne peuvent tester: & ne succèdent les uns aux autres, sinon tant qu'ils sont demeurans en commun.

Car le plus souuent, vn party, tout est party : & le chateau part le vilain.

LXIII.

Le feu, le sel, & le pain partent l'homme mortemain.

LXV.

Argent rachapte mortemain.

LXVI.

Serf ou homme de mainmorte ne peut estre Cheualier.

LXVII.

Ny prestre sans le congé de son seigneur.

LXVIII.

Et l'estant, n'est pource deschargé de rien, fors des couraées de son corps.

LXIX.

La femme serue n'est anoblie par son mary.

LXX.

Le seigneur a droict de suinte, & de formariage sur ses serfs.

LXXI.

Vn seul enfant estant en celle resqueust la mainmorte.

DES MARIAGE. TIT. II.

I.



Ille fiancée n'est prise ny laissée. Car tel fiance qui n'espouse point.

II.

Les mariages se font au ciel & se consomment en la terre.

III.

On dict communement, qu'en mariage il trompe qui peut, qui procede de ce que nos Maistres nous apprennent que *dolus dans causam contractui matrimonij non reddit illum ipsi iure nullum.*

Enfans de famille ne se peuvent marier sans le congé de leurs peres & meres, s'ils ne sont majeurs les fils de trente ans, & les filles de vingt cinq, sur peine de pouuoir estre desheritez.

V.

Lon disoit boire, manger, coucher ensemble c'est mariage ce me semble. Mais il faut que l'Eglise y passe.

VI.

Hommes & femmes mariez sont tenus pour emancipez.

VII.

Qui espouse le corps, espouse les debtes.

VIII.

Et sont les mariez communs en tous biens meubles & conquests immeubles du iour de leur benediction nuptiale.

IX.

A laquelle communauté les vefues nobles de ceux qui mouroient au voiage d'outre mer, eurent priuilege de pouoir renoncer: Et depuis en general toutes les autres.

X.

Ce qui a depuis esté estendu iusques aux roturieres par l'auctorité & inuétion de maistre Iean Iacques de Mesme.

XI.

Le mary ne pouuant directement, ny indirectement obliger les propres de sa femme.

XII.

Car ce qui se disoit jadis, que le mary se pouuoit releuer trois fois la nuit pour vendre le bien de sa femme, a finalement esté reprouué par les Arrests & coustumes modernes.

XIII.

L'on ne peut plus honnestement vendre son heritage qu'en constituant vn grand dot à sa femme.

XIIII.

Le mary est maistre de la communauté, possession & iouissance des propres de sa femme, & nō de la propriété d'iceux.

XV. Encores

XV.

Encores ne peut il disposer des biens de la communauté au proufit de son heritier presumptif, ny par testament au preiudice de sa femme.

XVI.

Femmes sont en la puissance de leurs maris.

XVII.

Ne peuuent contracter, ny ester en iugement sans l'auctorité d'iceux. Mais bien disposer par testament.

XVIII.

Si le mary est refusant de les auctoriser, elles seront autorisées par iustice, & le iugement qui interuiendra contre elles executé sur les biens de la communauté, icelle dissolue.

XIX.

Femme separée de biens, autorisée par iustice peut contracter & disposer de ses biens comme si elle n'estoit mariée.

XX.

Donation en mariage, ny concubinage ne vaut.

XXI.

Mais mary & femme n'ayans enfans se peuuent entre-donner mutuellement, pourueu dient quelques coustumes, qu'ils soient inels ou egaux en aage & cheuance.

XXII.

Don mutuel ne faist point.

XXIII.

Feu Monsieur le premier President le Maistre a releué ce prouerbe, Qu'il n'y a si bon mariage qu'une corde ne rompe.

XXIII.

Le mary faict perdre le deuil à sa femme, mais non la femme au mary.

XXV.

Femme vefue renonçant à la communauté iettoit jadis sa ceinture, sa bourse & ses clefs sur la fosse de son mary: maintenant il faut renoncer en iustice, & faire inuentaie.

XXVI.

Si elle recelle, ou destourne, renonciation ne luy profite.

Morte ma fille, mort mon gendre:

DES DOVAIRES. TIT. III.

I.

ADIS femmes n'auoit doüaire fors le conuenancé au mariage par ces mots. Et du doüaire te douë qui est deuise entre mes amis & les tiens. Depuis par l'establissement du Roy Philippes Auguste de l'an mil deux cens quatorze, rapportée par Philippes de Beaumanoir, elle a esté douée de la moitié de ce que l'hōme auoit lors qu'il l'espousa fors en la Couronne, Comtez, & Baronnies tenuës d'icelle, & en quelques d'onjons & forteresses.

II.

Et pareillement de la moitié de ce qui luy eschet en ligne directe pendant le mariage selon l'ancien aduis de Maistre Eude de Sens, receu contre l'opinion de quelques autres coustumiers.

III.

Car si mary n'estoit de rien faisi, & que son pere ou ayeul qui tenoient la terre y furent presens, ou cōsentans, la femme aura tel doüaire sur tous leurs biës apres leur mort que si son mary les eust suruescu.

IIII.

Maistre Iean Filleul disoit qu'aucun doüaire n'estoit tenable quant il surpassoit la moitié du vaillāt de celuy qui douë.

V.

Au coucher gaigne la femme son doüaire, ou plustost deslors de la benediction nuptiale.

VI.

Iamais mary ne paya doüaire.

VII.

Toutesfois s'il estoit forbanny ou confisqué ou ses heri-

tages faisis & vendus de son viuant, on le peut demander ou s'y opposer.

VIII.

La doüairiere s'opposant aux criées de l'heritage sur lequel ell'a doüaire faict qu'on le doibt vendre à la charge d'iceluy, sans quelle soit tenuë en prendre l'estimation.

IX.

Si ce n'estoit vne maison fize à Paris decretée pour rentes deuës sur icelle selon l'Ordonnance du Roy Charles septiesme.

X.

Doüaire coustumier s'aïst.

XI.

Doüaire prefix ou conuenance ne faïssoit point, & se deuoit demander en iugement : Ce qui commence à se corriger quasi par tout.

XII.

Femme qui prent doüaire conuenancé se priue du coustumier.

XIII.

Doüaire en meubles retourne aux hoirs du mary apres le decez de la femme : sinon qu'il soit accordé sans retour.

XIII.

Iadis femme ne prenoit point doüaire ou elle auoit assignat.

XV.

D'on mutuel n'empesche point le doüaire.

XVI.

Femme ne peut renoncer à son doüaire non acquis si elle n'en a esté recompensée ailleurs : mais bien a doüaire ja escheu.

XVII.

Doüaire coustumier ne laisse d'estre deu, ores que la femme n'ait r'emporté.

XVIII.

Doüairiere doit entretenir les lieux de toutes reparations viageres, qu'on dict d'entretienement, contribuer au ban, & arriere-ban, & payer les autres charges & rentes

foncieres, ordinaires: mais nō les cōstituees pēdant le mariage : celles d'auparavant diminuans autant le doüaire.

XIX.

L'heritier du mary doit releuer l'heritage sur laquelle femme prent doüaire.

XX.

Doüaires ont taifible hypothecque & n'antissement.

XXI.

La vefue peut contraindre l'heritier luy bailler son doüaire à part, & l'heritier elle de le prendre.

XXII.

La doüairiere lottit, & l'heritier choisit.

XXIII.

Doüaire propre aux enfans est vne legitime coustumiere prise sur les biens de leur pere par le moyen & benefice de leur mere.

XXIIII.

Lequel accroist aux enfans du mariage quant l'un d'eux decede du viuant du pere.

XXV.

Mais s'il decedoit apres la mort du pere, tous les enfans y succederoient, ores qu'ils ou aucuns d'eux fussent d'un autre liēt.

XXVI.

Que si tous les enfans decedent auant le pere, leur droit de doüaire est esteint.

XXVII.

Pendant les vies du pere & des enfans, nul d'eux ne le peut aliener ny hypothecquer au preiudice les vns des autres.

XXVIII.

En doüaire n'y a droit d'ainesse.

XXIX.

Tout ce qui se compte en legitime, se compte en doüaire.

XXX.

On ne peut estre heritier & doüairier.

XXXI.

Celuy des enfans qui se porte heritier du pere faict part pour diminuer d'autant le doüaire des autres, parce qu'en ce cas n'y a lieu d'accroissement.

XXXII.

Doüaire sur doüaire n'a lieu : de sorte que quand l'homme est marié plusieurs fois, le second doüaire n'est que du quart, & le troisieme de la huitiesme partie des biens subjects à iceluy.

XXXIII.

Mais à mesure que les premiers finissent, semble raisonnable que les autres s'augmentent selon leur ordre.

XXXIIII.

S'augmentēt aussi lesdits derniers doüaires en ce qu'ils se prennent sur les acquests faicts pendant les premiers mariages, & depuis.

XXXV.

Le doüaire qui est propre aux enfans ne se prescrit encontr'eux du viuant de leur pere, & n'en commence la prescription que du iour de son deceds.

XXXVI.

Tant que la femme & les enfans viuent, le doüaire est en incertitude, & s'appelle doüaire esgaré.

XXXVII.

La doüairiere gaigne les fruiets si tost qu'ils sont perceus, & son heritier les perd si elle decede aupara-
uant.

XXXVIII.

Femme qui forfait en son honneur pert son doüaire, s'il y en a eu plainte par le mary. Autrement l'heritier n'est receuable d'en faire querelle.

XXXIX.

Femme se remariant, ne doit point perdre son doüaire.

*DE VOVRIE, MAIN-BOVRNIE, BAIL
garde, tutelle & curatelle. TIT. IIII.*

I

BAil, garde, mainbour, gouverneur, legitime administrateur & regnant, sont quasi tout vn, cōbien que iadis, & encores en aucuns lieux garde se dit en ligne directe, & bail en collaterale.

II.

Les enfans sont en la voulrie & mainbournie de leurs pere ou mere soient francs ou serfs, maieurs ou mineurs.

III.

Le mary est bail de sa femme.

IIII.

Il n'accepte garde, ny bail, qui ne veur.

V.

Les tutelles sont datiuës.

VI.

Toutesfois quant par le testament y a tuteur nommé, il doit estre confirmé, si les parens n'alleguent cause legitime que le defunct eust vray-semblablement ignoré.

VII.

Les baillies ou gardes sont coustumieres.

VIII.

Gardes nobles & bourgeois doiuent estre acceptees en iugement.

IX.

Le mineur n'a bail ny tutele d'autrui.

X.

Gardiens & baillistres sont tenus faire visiter les lieux dont ils iouissent, à fin de les rendre en bon estat.

XI.

Qui bail ou garde prend, quitte le rend.

XII.

Par l'ancienne coustume de France les gardiens ou baillistres, ny les nobles mineurs de 20. ans, & les nō nobles de 14. ne pouuoient intenter, ny estre contraincts de defen-

dre en action petitoire de ce dont ils estoient saisis, comme heritiers. Ce qui fut corrigé par l'ordonnance du Roy Philippes de Valois, de l'an 1330. en les pouruoyant à ceste fin de curateurs.

XIII.

Bail se reigle le plus souuent selon les successions, & se donne coustumierement à ceux qui sont plus proches du costé dont le fief vient.

XIIII.

En vilanie, cotterie, ou roture n'y a bail.

XV.

En pareil degré l'aîné sera preferé aux autres.

XVI.

Les baillistres qui entrent en foy en leurs noms, la reçoient aussi des vassaux de leurs mineurs, & en prennent les rachapts.

XVII.

Garde doit rachapt & finance pour les fiefs dont il fait les fructs siens.

XVIII.

Relief de bail se paye toutesfois & quantes qu'il y a nouveaux baillistres.

XIX.

Tuteurs & curateurs n'entrent point en foy, & ne la reçoient, aussi ne doiuent-ils point de rachapt, ains demandent souffrance pour leurs mineurs: qui leur doit estre accordée.

XX.

Baillistres ny tuteurs ne reçoient adueu, & ne les baillent.

XXI.

Bail ou garde ne se peut transporter à autrui.

XXII.

Bail ou garde se pert par mes-vfage, ou quant le gardiẽ se remarie: & finit par la maiorité ou decrés du mineur.

XXIII.

La maiorité en ce cas est aux masles à xiiij. xv. xviiij. &

vingt ans selon la diuersité des coustumes: mais en ce qui concerne l'alienation de l'immuable, elle se doit prendre par tout à vingt-cinq ans.

XXIIII.

Si le bailistre rend la terre à son mineur auant son aage, ses hommes ne luy feront point hommage s'ils ne veulent: Comme aussi son seigneur, ne l'y recepura point s'il ne luy plaist.

XXV.

Tuteurs & baillistres doiuent incontinent faire inuentaire des meubles & tiltres des mineurs.

XXVI.

Inuentaires peuuent estre faicts à la requeste de ceux qui y pretendent interest.

XXVII.

Er par nos coustumes se faisoient par les Notaires & tabellions, selon ce qu'il est remarqué par Iean Faure.

DE COMPTE. TIT. V.

I.



Un ne reçoit la chose d'autrui qu'il n'en doive rendre compte.

II.

Tuteurs & autres subiects à compte, doiuent faire & recepte & despense entiere, les iustifier, & payer le reliqua.

III.

En compte n'y a point de prouision.

IIII.

Qui compte seul, compte deux fois, comme celuy qui compte sans son hoste.

V.

Comptes se rendent aux despens de l'oyant, mais le rendant les auance.

VI.

Vice ou erreur de calcul & de compte se purge en tout temps, qui est ce qu'on dict, A ton bon compte reuenir.

LIVRE II.

DE LA QUALITE ET

condition des choses. TIT. I.

I.

Tous biens sont meubles ou immeubles.

II.

Immebles sont biens aleuds, amortis, feodaux, roturiers, tenus à droictures, cens & rentes foncieres ou constituées, baux d'heritages à longues années, ou a faculté de rachapt, & autres choses qui rendent reuenu.

III.

Or & argent monnoyé & à monnoyer, & tout ce qui se peut transporter de lieu en autre, noms, raisons, & actions pour choses mobiliaries sont meubles.

IIII.

Deniers destinés pour achapt, ou procedant de vente d'heritage, ou de rachapts de rentes sont reputez immeubles, mesmement en faueur de femmes contre leurs maris, & de mineurs contre leurs tuteurs.

V.

Fruicts pendans par les racines sont immeubles.

VI.

Toutesfois en beaucoup de lieux foings à couper apres la my May, bleds & autres grains apres la saint Iean, ou qu'ils sont nouëz, & raisains à la my Septembre, sont reputez meubles.

VII.

Poissons qui sont en estangs apres trois ans, ou la bonde

C

estant leuée ou mis en huches sauuouërs ou reseruouërs font meubles : autrement sont reputez immeubles comme faisans partie de l'estang.

VIII.

Ce qui tient à fer, plomb, cloud, ou cheuille est réputé immeuble.

IX.

Gran des cuues, & autres gros vstanciles qui ne se peuvent desassembler n'y transporter sans incommodité : moulins tournans à vent ou à eau sur basteaux, ou autrement : pressouërs & artilleries sont tenus pour immeubles.

X.

Comme aussi sont les principales bagues & ioyaux, reliques & liures des maisons des Princes & hauts Barons.

XI.

Meubles ne tiennent cotte ny ligne.

XII.

Le meuble suit le corps, & l'immeuble le lieu où il est assis.

XIII.

Tous biens sont réputés acquests s'il n'appert du contraire.

XIII.

L'acquest du pere est le propre de l'enfant.

XV.

L'heritage escheu par succession, legs, ou donation fortit nature de propre, quant l'heritier, ou donataire deuoit, succeder à celuy dont il procede.

XVI.

Heritage eschangé est de pareille nature qu'estoit le contre eschange.

XVII.

Terre sans hebergement n'est que demie reuenue.

XVIII.

Rente fonciere est estimee au denier 20. l'autre au denier 12, maintenant seize.

XIX.

Tenir eu franc alleu est tenir de Dieu tant seulement, fors quant à la iustice.

DE SEIGNEURIE

& Iustice.

I.



Vlle terre sans Seigneur.

II.

Tous biens sont communs, & n'y a moyens que de les auoir : mais il faut qu'ils soient legitimes.

III.

Car tout fut à autrui & à autrui fera.

IIII.

Les grands chemins & riuieres nauigables appartiennent au Roy.

V.

Les petites riuieres & chemins sont aux seigneurs des terres, & les ruisseaux aux particuliers tenanciers.

VI.

La seigneurie des Seigneurs s'estend iusques aux bords des grandes riuieres: & des subiects tenanciers iusques aux petites.

VII.

Grosses riuieres ont pour le moins quatorze pieds de largeur, les petites sept, & les ruisseaux trois & demy.

VIII.

La riuere oste & donne au haut iusticier : mais motte ferme demeure au proprietaire tres-foncier.

XIX.

On ne peut tenir riuere en garenne ou deffense, s'il n'y a tiltre ou prescription.

X.

Isle est au seigneur haut iusticier en la iustice duquel elle est plus pres, eu esgard au fil de l'eau.

XI.

Nul ne peut bastir coulombier à pied, asseoir moulin, ny bonde d'estang, ny fouiller en terre pour y tirer minieres, metaux, pierre ou plastre, sans le congé de son Seigneur, si ce n'est pour son usage.

XII.

Terres qui sont aux issuës des villes, bourgs & villaiges ne sont defensables si elles ne sont bouchees.

XIII.

Car Qui ferme ou bouche, empesche & defend.

XIIII.

Vignes, jardins & guarennnes sont defensables en tout temps.

XV.

Bois taillis sont defensables iusques à trois ans & vn May.

XVI.

Prés sont defensables depuis la my-mars iusques à la Toufaincts, ou que le foing soit du tout fenné & enleué.

XVII.

En nul temps on ne peut mener porcs en pré.

XVIII.

Vaines pastures ont lieu de clocher à clocher : mais les grasses n'appartiennent qu'aux comuniers de la paroisse.

XIX.

On ne peut tendre ny thefurer en autrui domaine.

XX.

Le seigneur de fief faisant construire estang ou garenne y peut enclore les terres de ses subjets en les recompensant preallablement.

XXI.

Bornes se mettent par auctorité de iustice.

XXII.

Le pied faist le chef.

XXIII.

Le bois acquiert le plain.

XXIIII.

En moulins bannaux qui premier vient, premier engraine.

XXV.

Mais apres auoir attendu 24. heures, Qui ne peut à l'un s'en aller à l'autre.

XXVI.

Labanlieuë est estimée à deux mille pas, chacun vallant cinq pieds: ou à six vingts cordes, chacune de six vingts pieds.

XXVII.

Droict de mousture est que les muniers doiuent rendre drez le comble, ou de douze, treize ou quatorze combles ou pallés.

XXVIII.

Qui prent bestes en dommage, ne les peut retenir, ains les doit mener en iustice dans 24. heures.

XXIX.

Les dismes appartiennēt aux Curés, s'il n'y a titre ou possession au contraire.

XXX.

Coustumierement en dismeries d'Eglise n'y a point de fuitte, mais bien en patrimoniales.

XXXI.

Dismes layes infeudées sont pures patrimoniales.

XXXII.

Terres & choses decimales tenus en fief ne sont non plus affranchies de dismes spirituelles, que sont les autres domaines.

XXXIII.

La iustice est patrimoniale.

XXXIIII.

Tous seurs iusticiers doiuent la iustice à leurs despens.

XXXV.

Fief, ressort, & iustice n'ont rien de commun ensemble.

XXXVI.

Il y a iustice haute, moyenne, & basse.

XXXVII.

Donner poids & mesures, tuteurs & curateurs, faire inventaire & partages sont exploits de moyenne iustice.

XXXVIII.

Pillory, eschelle, quarquant, & peinture de champions combatats en l'Auditoire, sont marques de haute iustice.

XXXIX.

L'ancien coustumier porte que nul ne peut auoir pillory en ville où le Roy en ayt, mais seulement eschelle ou carquant.

XL.

Donner asseurement, ou congé d'ouurir terre en voye publique sont exploits de haute iustice.

XLI.

Biens vacquans, terres hermes, & espaues appartiennent au haut iusticier.

XLII.

Qui a fief, a droit de chasse.

XLIII.

Le Roy applique à foy la fortune & treuve d'or.

XLIII.

Mais quant aux autres tresors mucés d'ancienneté, le tiers en doit appartenir au haut iusticier, le tiers au seigneur tresfoncier, & le tiers à celuy qui les a trouuez.

XLV.

Si le propriétaire du lieu les trouue en son fonds, il doit partir par moitié avec le haut iusticier.

DE SERVITUTES. TIT. III.

I.



N villes tout mur est metoyen s'il n'appert du contraire.

II.

La marque du mur metoyen est quand il est chapperonné, ou y a fenestre des deux costez.

III.

En mur metoyen il est loisible d'avoir fenestres sur son voisin à verre, & fer dormans à neuf pieds de hauteur du rez de chaussée, & à sept pieds des autres estages: mais aussi est-il loisible au voisin les estoupper en se servant du mur, & rembourfant son voisin de la moytié d'iceluy selon son hebergé.

III.

En mur propre encores plus, & sans que le voisin le puisse estoupper, ny s'aider d'iceluy, mais peut bastir contre, sur son fonds.

V.

Vn voisin peut contraindre l'autre de se clorre, en ville de murailles & autres cloisons iusques à neuf pieds, & es villages de hayes vifues.

VI.

Si le voisin ny peut contribuer, il sera quitte en baillant autant de sa place que sa part pourroit couster.

VII.

Le fossé appartient à celuy sur lequel est le reiect. Car Qui douve a, si a fossé.

VIII.

La haye vifue, buisson, terme, ou borne estans entre pré & terre, vigne, ou bois sont reputez estre du pré, & non de la terre, vigne ou bois.

IX.

Si aucun a jardin ou terre labourable, estable, cheminée ou aïssances cōtre mur metoyen, il y doit faire cōtre mur, & s'il y a four ou forge doit laisser demy-pied d'interualle vuide.

X.

Si vne maison est diuisée en telle sorte que l'un ayt le bas, & l'autre le haut, chacun est tenu d'entretenir ce qui est à foy.

XI.

Nul ne peut auoir entrée, issue, glaçouër, éuier, esgoust, ou gouttiere sur son voisin s'il n'en a titre.

XII

S'il est besoin de couvrir vn toit dont l'eau doit tomber sur son voisin, il est aussi tenu de bailler place pour le tour de l'eschelle.

XIII.

Nul ne peut faire gouttiere sur ruë plus bas que de vingt-deux pieds & demy.

XIII.

Ceux qui bastissent aux villes peuuent tenir leurs materiaux deuant leurs maisons, pourueu qu'ils laissent espace d'un costé de la ruë pour y passer les chariots.

*DE TESTAMENTS ET
execution d'iceux. TIT. IIII.*

I.



Ntre testament & codicile n'y a point de difference.

II.

Vn Curé ou son vicaire general peut receuoir testament en presence de deux tesmoins : mais il faut qu'il soit signé du testateur & desdits tesmoins, ou qu'il soit fait mention qu'ils ne sçauent ou peuuent signer.

III.

Institution d'heritier n'a point de lieu.

IIII.

Toutefois institution par paction ou recognoissance d'heritier, & donation particuliere par contract de mariage vaut

vaut par la loy Salique des François, & ne se peut reuoyer.

V.

Reconnoissance generale de principal heritier n'empesche qu'on ne puisse s'ayder de son bien : ains seulement qu'on n'aduantage vn autre au preiudice du marié, des biens qu'on auoit lors.

VI.

L'on ne peut faire rappel à succession au profit de celuy qui en est exclus, que iusques à la concurrence de ce dont on peut disposer par testament.

VII.

En succession directe on ne peut estre heritier & donataire, mais bien en collaterale.

VIII.

Les legataires doiuent estre saisis par l'heritier, ou par les executeurs testamentaires quand les laigs sont mobiliaries, & s'en peuuent aussi les executeurs payer par leurs mains.

IX.

Legataires vniuersels sont tenus pour heritiers.

X.

Executeurs de testaments, inuentaie preallablement faict, sont saisis par an & iour des biens meubles du testateur pour l'accomplissement de son testament, payement des laigs mobiliaries, acquit de ses debtes & forfaits: & si les meubles ne suffisent, leur sera permis par la iustice vendre quelque immeuble.

XI.

L'an & iour de leur execution expirez doiuent rendre compte, auquel ils peuuent employer leur salaire, qui leur sera taxé raisonnablement.

XII.

La cognoissance des executions testamentaires appartient euz Iuges laiz.

DE SUCCESSIONS ET
hoiries. TIT. V.

I.



E mort faist le vif son plus prochain heritier habile à luy succeder.

II.

Il n'est heritier qui ne veut.

III.

Mais qui prend des biens de succession iusques à la valeur de cinq sols, faict acte d'heritier.

IIII.

L'heritier simple exclut l'heritier par benefice d'inventaire. Ce qu'on restraint aux collateraux.

V.

Iadis representation n'auoit point de lieu. Maintenant elle est receuë quasi par tout en ligne directe : & par beaucoup de coustumes en la collateralle iusques aux enfans des freres.

VI.

Où representation a lieu infiniment, ce qui eschet au pere, eschet au fils.

VII.

Ce qu'on a dict, Tant que le tige a souche, elle ne se fourche, est-ce pas Tant que la ligne directe dure, la collateralle n'a point de lieu ?

VIII.

En succession tant directe que collateralle dedans les termes de representation on succede par lignes, & hors les termes de representation par testes.

IX.

Maistre Alain Chartier dict que par vsage & coustume gardee de tout temps en ce Royaume toutesfois & quan-

tes que femme est deboutée d'aucune succession, comme de fief noble, les fils qui en viennent & descendent en sont aussi forclos.

X.

Au Royaume, & Baronnies tenans d'iceluy, representation a lieu en successions tant directes que collaterales.

XI.

Les heritiers sont tenus des faicts & obligations du defunct personnellement chacun pour sa part, & hypothécairement pour le tout.

XII.

Les François, comme gens de guerre, ont receu diuers patrimoines, & plusieurs heritiers d'une seule personne.

XIII.

Etlors les debtes se payent au feur de ce que chacun en amende, si ce n'est es lieux qui portēt: Que celuy qui prend les meubles paye les debtes, les propres demeurās francs & quittes aux parens lignagers: qui estoit l'ancienne coustume de la plus-part du Royaume.

XIII.

Les propres ne remontent point, mais retournent aux plus prochains parens du costé dont ils sont venus au defunct, Qui est ce qu'on dict, *paterna Paternis, materna maternis*.

XV.

Toutesfois ce qui est donné aux enfans par leurs pere ou mere leur retourne, quand il n'y a point d'enfans des donataires.

XVI.

Les ascendants succedent aussi aux meubles & acquests de leurs enfans: autrement ils vont aux plus prochains parens du defunct.

XVII.

Par la pluspart des coustumes les parens conioincts d'un seul costé succedent avecques ceux qui sont conioincts de double ligne, suivant les aduis de maistres Iean le Coq, Pierre le Sec, & autres anciens sages sur ce ouys par tourbe.

L'oncle succede au nepueu auant le cousin germain.

L'oncle & le nepueu sont en pareil degré, & succedent également où il ny a point de representation. Car autrement le nepueu representant son pere exclurroit l'oncle du defunct.

Representation accordée en ligne collaterale ne profite qu'à celuy en faueur duquel elle est faicte: mais en ligne directe, s'estend iusques à tous ceux qui se trouuēt en pareil degré.

Entre nobles, le suruiuant sans enfans gaigne quasi partout les meubles.

Autrement la femme ne succede point au mary, ny le mary à la femme.

Renonciation à succession faicte en faueur de quelqu'un ne vaut quant elle estoit ja diferée, & qu'il y a lesion & minorité: mais faicte à succession non escheuë en faueur des masles: vaut, soit qu'elle soit faicte par mineur ou maieur, pourueu que le renonçant ait eu sa legitime, laquelle en tout cas il luy faut parfournir: & procede ce droit de la loy Salique ou Françoisse.

L'on à dict autrefois, qu'Où ramage default, lignage succede. Maintenant la ligne defaillant d'un costé, les pere & mere, & autres ascendans succedent: puis l'autre ligne: & à faute de tous parents, le seigneur haut iusticier.

Par la Coustume de France, Capitulaires, & Ordonnances du Roy Charles VI. de l'an mil trois cens quatre vingts-six, les Ecclesiastiques succedent à leurs parens, & leurs parens à eux, & peuuent disposer de leurs biens tout ainsi que

les lays, jaçoit qu'ils leur soient aduenus ou accreus du re-
uenue de leurs benefices.

XXVI.

Religieux ne succedent point, ny le Monastere pour eux:
& si ne peuuent de rien disposer.

XXVII.

L'habit ne faict point le moine, mais la profession.

XXVIII.

Bannis à perpetuité, ny condemnez aux galeres ne suc-
dent.

DES PARTAGES ET

rapports. TIT. VI.

I.



Vi demande partage faict les lots : & coustumie-
rement l'Aîné lottit, & le puisné choisit.

II.

Enfans aduantagés de pere & mere doiuent rapporter ce
qui leur a esté donné en mariage ou autrement, moitié en
vne succession, moitié en l'autre, ensemble les fruiçts per-
ceus depuis la succession escheuë, au moins prendre à la
raison de la prisée qui en fut faicte, ou de ce qu'ils en au-
roient eu sans fraude, les reparations vtils & necessaires
toufiours deduites ou descomptees.

III.

Nourriture, & entretenement aux armes, escholes, ap-
prentissage de mestier, ou faict de marchandise, despen-
se, ny don de nopces en meubles ne sont subjects à rap-
port.

IIII.

Le fils renonçant à la succession du pere & venant à celle
de son ayeul, y doit rapporter tout ce qui auoit esté donné
ou presté à son pere.

V.

La fille doit aussi rapporter tout ce qui fut presté par son pere à son mary, ores qu'elle renonce à sa communauté.

VI.

Rapport n'a lieu en ligne collaterales s'il n'est dict.

LIVRE III.

DE CONVENTIONS, CONTRACTS
& obligations. TIT. I.

I.



On uenances vainquent loy.

II.

On lie les bœufs par les cornes, & les hommes
par les paroles.

III.

Il n'ya au marché que ce qu'on y met.

IIII.

C'est pourquoy vn ancien coustumier dict que Quand mise ou arbitrage est mis sur deux qui ne se peuuent accorder, ils ne peuuent prendre vn tiers s'il ne fut mis en la mise. Ce qui est pris du droict civil.

V.

Toute debte peut l'en quitter.

VI.

Toutesfois de l'arrecin ou d'iniures dont il y a claim & plait l'on n'en peut accorder sans iustice.

VII.

Celuy qui auant quitte, se mesfaict.

VIII.

Qui prent obligation, ou donne terme en debte priuile-gée, la faict commune.

IX

General renonciation ne vaut.

X.

Quant argent faut, finaison nulle.

XI.

J'ay tousiours esté d'aduis, & suis encores, que Qui promet fournir & faire valoir, s'oblige en son nom, & sans discussion: quoy qu'il ait esté iugé au contraire.

XII.

Quant deux s'obligent ensemblement l'un pour l'autre & vn chacun d'eux seul pour le tout, ils renoncent en effect au benefice de diuision & discussion.

XIII.

Le & cætera, des notaires ne sert qu'à ce qui est de l'ordinaire des contracts.

XIIII.

L'Entente est au diseur.

DE MANDEMENTS, PROCUREURS

Entremetteurs. TIT. II.

I.



SEZ faict qui faict faire.

II.

Qui outrepasse sa charge, chet en desadueu.

III.

Messire Philippes de Fontaine remarque Que nostre vusage ne souffroit pas que procureur quiere heritage à autrui, mais qu'il retient ce qu'on luy à baillé a garder.

IIII.

Iadis aussi nul de pays coustumier n'estoit receu à faire demande par procureur en la Cour du Roy sans ses lettres de grace, si ce n'estoit pour prelat, communauté d'Eglises, ou de villes.

V.

Ou biē à se defendre. Ce qui n'auoit lieu en pays de droict escript, ny en Cour de Chrestienté: & ce tant en matiere ciuile que criminelle.

Qui s'entremet doit acheuer.

DE COMMUNAVTE, COMPAGNIE
ou société, & principalement entre le mary
& la femme. TIT. III.

I.



COMMUNAVTE n'a lieu si elle n'est conuenüe par expres, ou si la loy ou coustume ne l'ordonnent, quelque demeure qu'on ait faict ensemble.

II.

Qui a compagnon a maistre, & principalement quant c'est le Roy.

III.

De bien commun on ne faict pas mouceau.

IIII.

Si l'un des deux ayant chose commune s'en sert, il n'est tenu d'en faire profit à l'autre, s'il n'auoit esté sommé, & refusant de faire partage.

V.

Mary & femme sont communs en tous biens meubles & conquests immeubles au lieu que jadis elle n'y prenoit qu'un tiers.

VI.

Laquelle communauté est continuée entre le suruiuant ne faisant inuentaie, & ses enfans mineurs.

VII.

Et quant le suruiuant se remarie, la communauté est continuée par tiers entre luy, sa seconde femme n'ayant enfans, & sesdits enfans: & par quart si la seconde femme auoit enfans & qu'elle n'eust non plus faict inuentaie ny partage avecques eux. Et ainsi des autres mariages.

VIII

Si aucun des enfans continuant la communauté, decede pendant icelle; les suruiuans y prendront telle part que s'ils estoient tous viuans.

IX.

Le tout si bon semble ausdits enfans mineurs: autrement ils peuuent reprendre leurs droicts.

X.

Si le suruiuant mariant l'un de ses enfans luy donne mariage, la communauté est dissoluë pour son regard.

XI.

Mary ou femme ayant melioré leur propre, ou reüny quelque chose à leur fief & domaine, sont tenus d'en rendre le my-denier.

XII.

Quant l'on rachapte quelque rente, dont l'heritage de l'un ou de l'autre estoit chargé, elle est confuse tant que le mariage dure: mais iceluy dissolu la moitié de la rente se reprent sur le mesme heritage.

XIII.

Toutes donations, laigs, & succeffions escheuës pendant le mariage, entrent en communauté: sinon que ce fut heritage donné ou laissé par celuy auquel on deuoit succeder.

XIIII.

Si quelques deniers ont esté baillez au mary à la charge de les employer en heritages propres, & ne l'a faict; la femme ou ses heritiers renonceans à la communauté les reprendront sur ladicte communauté: sinon sur les propres du mary decedé & sans cōfusion, cōme tenoit maistre Mathieu Chartier, l'oracle du Palais. Ce qui n'a lieu quant la femme prent communauté: d'autant qu'en ce faisant elle prendroit deux fois.

XV.

Le droict de pouuoir renoncer à la communauté passe à l'heritier.

XVI.

Femme renonçant à la communauté pert le don mutuel qu'elle pourroit avoir, reprenant ses propres, & acquêts qu'elle avoit auant son mariage, avec ses bōs habits. Ce faisant est deschargée de toutes debtes, esquelles elle ne s'est obligee en son nom.

XVII.

Femme vefue prend part à la reparation civile adiugée pour la mort de son mary, ores qu'elle renonce à la communauté comme aussi faict l'enfant ores qu'il ne fust son heritier, & sans charge de debtes

XVIII.

Lon ne se peut assembler pour faire corps de communauté, sans congé & lettres du Roy.

XIX.

Si le mur du voisin penche demy-pied sur l'autre, il peut estre contrainct de le refaire.

DE VENTE. TIT. IIII.

I.

Vivend, dict le mot.

II.



Il y a plus de fols achepteurs que de fols vendeurs.

III.

Iamais bon marché ne fut net.

IIII.

Il n'est pas marchand qui tousiours gaigne.

V.

Tant vaut la chose qu'elle se peut vendre.

VI.

L'on n'a pas plustost vendu la chose qu'on n'ya plus rien.

VII.

Deliurance de meuble vendu presuppose payement.

VIII.

Quand le vendeur recognoist la vente, mais dict que ce fut par force, guarentir luy conuient, & puis apres plaider de la forces'il luy plaist.

IX.

En chose venduë par decret, l'euiction n'a point de lieu.

X

En vente faicte par decret, ne chet rescision pour deception d'outre moitié de iuste prix.

XI.

Ny en vente de successiõ ou droits vniuersels ny en baux à ferme, ny en meubles par coustume generale de la France.

XII.

De tous marchés on en vuide par interest.

XIII.

Vin de marché n'entre point en compte du prix, pour en prendre droicts de ventes: sinon qu'il fust fort excessif.

XIIII.

Il ne prend courtier qui ne veut.

XV.

Courretiers sont tenus rendre la marchandise ou le prix, par prise & detention de leurs personnes.

XVI.

Vn vendeur de cheuaux n'est tenu de leurs vices, fors de morve, pousse, corbes & courbatures: sinon qu'ils les ait vendus sains & nets: auquel cas il est tenu de tous vices latens & apparens iusques apres huiet iours de la deliurance faicte.

XVII.

Languayeurs sont tenus reprendre les porcs qui se trouuent mezeaux en la langue. Et s'il ny auoit rien en la langue, & neantmoins se trouuent mezeaux dans le corps, le vendeur est tenu en rendre le prix, sinon que tout vn troupeau fust vendu en gros.

VIII.

En meubles, la mesure s'en doit faire selon le lieu ou la vente se faict: en immeubles, selon le lieu de leur situation.

En vente faicte à faculté de rachapt les droicts sont deus au seigneur ou fermier du iour de la vente, & non de la faculté expirée.

DE RETRAICTS. TIT. V.

I.

Ly a trois fortes de retraicts : conuentionnel, lignager, & seigneurial & : en quelques lieux vn quatriesme, a droict de bienseance, & communauté.

II.

Le seigneurial est censuel ou feudal, & s'appelle coustumierement droict de retenuë.

III.

Le feudal a lieu par tout le Royaume, le censuel en quelques coustumes seulement.

IIII.

Retraict lignager est preferé au seigneurial, & le conuentionel à tous autres.

V.

Mais le retraict lignager ne dure qu'un an apres l'enfaifinement sans qu'on soit tenu rien faire signifier : le seigneurial xxx. ans, si on ne fait sçauoir le contraict.

VI.

Retraict seigneurial & conuentionnel est cessible : le lignager non, si ce n'est à vn lignager.

VII.

Le Roy n'a droict de retraict seigneurial : aussi n'en peut on vser contre luy : mais bien a retenuë par droict de bienseance.

VIII.

L'Eglise a droict de retenuë : mais il faut qu'elle le cede,

ou en vuide ses mains dans l'an & iour.

IX.

Disme infeudée acquise par l'Eglise n'est subiette à retraict.

X.

Cil ne requiert pas suffisamment les choses à retraict qui à Court aduenant ne les requiert.

XI.

Il est au choix du retrayant faire adiourner l'acquireur pardeuant le Iuge de la personne, ou de la situation de la chose vendue.

XII.

Congé de Cour contre le retrayant auant contestation emporte gain de cause.

XIII.

Defaut de fournir par le retrayant à ce qu'il est tenu par les coustumes le faict dechoir du retraict.

XIIII.

Qui ne feroit habile à succeder, ne peut à retraict aspirer.

XV.

Bastards ne sont receus à retraict.

XVI.

Le fils peut retraire l'heritage vendu par son pere.

XVII.

Voire quand il n'auroit esté ny né, ny conceu lors de la vente.

XVIII.

Retraict accordé volontairement sans iugement est réputé vendition.

XIX.

Retraict n'a lieu en vsufroi, ny en meubles s'ils ne sont fort precieux & des grandes maisons.

XX.

En eschange d'immeubles, donation, fief & bail à rente non rachaptable & sans bourse deslier, retraict n'a lieu.

XXI.

Mais en emphyteose & rentes foncieres vendues y a re-
traiet, & non en rente racheptable.

XXII.

L'eschange est reputé frauduleux quand l'un des contra-
ctans se retrouve iouissant dans an & iour de la chose qu'il
auoit baillée en contreschange.

XXIII.

En rentes foncieres vendues seroit-il pas raisonnable
preferer les debteurs d'icelles, suiuant quelques coustumes?

XXIIII.

Biens confisqués ne son subjets à retraiet.

XXV.

Tant que celuy qui n'est en ligne a des enfans qui sont en
ligne, retraiet n'a lieu.

XXVI.

Voire la seule esperance d'auoir des enfans, & le lien de
mariage conseruent le droit de la ligne.

XXVII.

Mais tous les enfans estans decedés, & l'esperance faillie
il y a lieu de retraiet dans l'an & iour du dernier decedé.

VXVIII.

Heritages vendus par decret sont neantmoins subjets à
retraiet.

XXIX.

Retraiет lignager ne se recognoist à quartier.

XXX.

Et pour ce quand plusieurs heritages sont vendus par vn
mesme contract, & par vn mesme prix, desquels les vns
sont subjets à retraiet, les autres non, il est au choix de
l'acquerer de delaisser le tout, ou ceux de la ligne seule-
ment.

XXXI.

Mais le seigneur n'est contraignable prendre ce qui n'est
de son fief.

XXXII.

Le retrayant n'est tenu payer que le prix, frais, & loyaux

cousts de la premiere vente, ores que la chose ait marché en beaucoup d'autres mains pendant l'an & iour du retraict.

XXXIII.

Loyaux cousts sont entendus frais de lettres, laboures, semences, façons & reparations necessaires.

XXXIII.

Pendant le temps du retraict l'acquerer ne peut alterer les choses au preiudice du proëfme.

XXXV.

L'an du retraict ne court que du iour de la faifine en roture: ou en fief, du iour de la reception en foy.

XXXVI.

Le seigneurial plus coustumierement court xl. iours apres le contract exhibé.

XXXVII.

La faculté de rachapt n'empesche point le cours du tēps du retraict.

XXXVIII.

Le seigneur feudal ou censuel qui a receu les droicts seigneuriaux, cheuy & composé, ou baillé souffrance d'iceux, ne peut vser de retraict.

XXXVIII.

Mais il n'en est exclus pour auoir receu les cens, rentes ou autres redeuances annuelles.

XL.

Par coustume generale du Royaume le temps des retraicts lignagers & feudal court contre les mineurs, absens, croisés, furieux, bannis, & tous autres sans esperance de restitution, contre ce qu'on tient en droict escript.

XLI.

Tout heritage retenu par puissance de seigneurie est réputé reüny à iceluy, s'il ny a declaration au contraire.

XLII.

Les fruiets sont deus au retrayant du iour de l'adiournement & offres bien & deuëment faictes, ores qu'il n'y ait consignation.

En matiere de retraict, & quasi tousiours le iour s'entent depuis le soleil leué iusques au couché.

DE LOVAGE. TIT. VI.

I.



Enduë ou achapt passe loüage.

II.

Celuy qui sert & ne parsert, son loyer pert.

III.

Il n'ya point de raison en ce qui se dict, que Mort en mariage rompent tout loüage, si on ne l'entent de ceux qui meurent ou se marient pëdant le temps du loüage de leurs personnes.

IIII.

Le locataire doit estre tenu clos & couuert.

V.

Le propriétaire peut contraindre son hoste de garnir sa maison de meubles exploictables pour seureté de son loüage: Et à faute de ce, l'en peut faire sortir.

VI.

Il est permis au propriétaire faire saisir les biës de son hoste encores qu'il ne soit ny obligé ny condamné pour les termes qui luy sont deus.

VII.

Les grains & biens meubles d'un fermier & locataire sont taiblement obligés pour les moisons & loyers du propriétaire.

VIII.

Les propriétaires sont preferez à tous autres creanciers pour les moisons & loyers de l'annee courant.

IX.

Le locataire peut vser de retention de ses loüages pour repara-

DE GAGES ET HIPOTHEQVES. 41
reparations necessaires par luy faictes du consentement
du propriétaire, ou apres sommation precedente.

X.

Qui iouit & exploicte vn heritage apres le terme finy sans
aucune denonciation, peut & doit iouyr vn an apres à pa-
reil prix que deuant.

XI.

Le temps du loüage finy le locataire a huiet iours pour
vuider : apres lesquels il y est contrainct par execution &
mise de ses meubles sur les carreaux.

DE GAGES ET HIPOTHEQVES.
TIT. VII.

I.



Ly a deux sortes de gage; vif & mort.

II.

Vif-gage est qui s'acquitte de ses issuës, Mort-gage
qui de rien ne s'acquitte.

III.

Mort-gage n'a coustumierement lieu qu'en deux cas : en
mariages de maisnés, ou de filles, ou pour don & aumosne
d'Eglises.

IIII.

Pleige, plaide : gage, rend.

V.

Meubles n'ont point de fuite par hypothecque quand
ils sont hors de la possession du debteur.

VI.

Toutesfois si le meuble saisy n'estoit payé par le debteur,
& qu'il fust saisy par celui qui le luy auoit vendu, il y au-
roit lieu de fuite.

VII.

Et pareillement au profit du creancier, si le saisy le ven-
doit depuis son execution.

F

VIII.

Item celuy qui tient le gage, a hypothèque priuilegiée sur iceluy auant tous autres. Et si ne peut le débiteur demander respit contre iceluy, par l'ordonnance du Roy Philippes Auguste.

IX.

Bourse, ou argent n'a point de suite.

X.

Les premiers vont deuant.

XI.

Scedule priuée recogné en iugement ou par deuant notaires emporte hypothèque du iour de la recognoissance ou de la denegation d'icelle en iustice, apres qu'elle a esté verifiée.

XII.

Et neantmoins en separations de biens, les creanciers chirographaires du defunct sont preferez à tous les creanciers de son heritier.

XIII.

Par l'Edict de Moulins hypothèque a lieu sur les biens du condamné du iour de la sentence confirmée par arrest.

XIII.

Contracts passez sous seal de Cour laye engendrent hypothèque.

XV.

Contracts passez en Cour d'Eglise n'emportent point d'hypothèque.

XVI.

Les mineurs & les femmes ont hypothèque taissible & priuilegee sur les biens de leurs tuteur & maris du jour de la tutele, & contract de mariage.

XVII.

Es cas esquels y a hypothèque taissible, les realisations, nantissements, & faisines introduictes par aucunes coustumes ne sont point requises.

Hypothèque ne se diuise point.
XIX.

Quand l'action personnelle concurre avec l'hypothécaire, celui des heritiers qui ne seroit tenu que pour sa part personnellement, est tenu hypothécairement pour le tout.
XX.


En speciale hypothèque n'y a point de discussion.
XXI.

En faict d'hypothèques, cens, ou rentes, il faut payer ou quitter.

LIVRE III.

DE RENTES. TIT. I.

I.

 N met sa terre en gagnaige par baux à rente, cens, ou fief.

II.

Les rentes sont reelles & immobilières, les arrerages personnels & mobilières.

III.

En succession ou partage de rentes, on regarde le domicile de celui auquel elles appartiennent.

III.

Le prix de la rente constituée estoit au denier douze par l'ordonnance du Roy Charles septiesme de l'an 1441. reductibles rachetables à ce prix & s'il n'apparoissoit du contraire.

V.

Maintenant par l'ordonnance du Roy Henry III. la constitution d'icelles est reduite au denier 16.

VI.

Toute rente constituée en grain ou autre espee est reductible à argent selon le prix qu'elle a esté vendue par l'ordonnance de l'an 1565.

VII.

Si elle estoit constituée au denier dix, elle estoit reduisible à xij. si au dessous du denier dix, usuraire.

VIII.

Rentes sur heritages deües aux Ecclesiastiques ne sont racheptables si elles ne sont constituées sur maisons de villes, & signamment de Paris, suivant les ordonnances des Rois François premier, & de Henry II.

IX.

Vente d'heritages à faculté de rachapt à vil prix, duquel l'acquireur reçoit profit ou rente à la raison de l'ordonnance par bail à ferme par luy fait à son vendeur, est reduite à rente racheptable. Et si tel contract estoit fait par gens qui fussent coustumiers d'usurer, il seroit reputé usuraire.

X.

De rentes constituées on ne peut demander que cinq années d'arrérages, par l'Edit du Roy Louys XII.

XI.

Rentes infeudees nō racheptables sont reputées feudales: toutes les autres sont roturieres, ores qu'elles soient vèduës & constituées sur fief.

XII.

Tous detenteurs, propriétaires & possesseurs d'heritages charges de rentes sont tenus personnellement & hypothecairement payer les arrérages de leur temps, & les precedens hypothecairement. Ce qu'ayant esté premierement introduit pour rentes fōcieres, & realisees ou nanties, a esté depuis estendu aux rentes constituées & racheptables. Et par aventure mal à propos.

XIII.

L'effect de l'obligation personnelle est que le detenteur en peut estre executé en tous ses biens: & de l'hypothecaire, que l'heritage obligé peut estre saisy & adiugé sans qu'il soit besoing discuter ceux du principal obligé.

XIIII.

Neantmoins les detenteurs s'en peuvent descharger en deguerpissant, voire mesmes les preneurs à rente, & leurs

hoirs : sinon qu'il y eust promesse de fournir & faire valoir.

XV.

Tout deguerpissement se doit faire en iustice.

XVI.

Qui deguerpit, doit payer les arrerages passez, l'annee courante, & vn terme de plus.

XVII.

Les seigneurs censiers & rentiers peuuent proceder par faisie sur les heritages subiects à cens & rentes, laquelle tiët pour les trois dernieres annees pretenduës & affermees par le seigneur nonobstant opposition, tant suiuant l'ordonnance de Charles 9. de l'an 1563. que plusieurs coustumes anciennes & modernes.

XVIII.

Toutes rentes sont requerables s'il n'est autrement conuenu.

XIX.

L'adjournement faict contre l'un des detenteurs pouruiuy pour le tout, fert d'interruption contre les autres.

XX.

Celuy qui doit rente fonciere ou autre droit seigneurial pour raison d'aucun heritage, en doit faire veuë oculaire à son seigneur vne fois en sa vie : ou luy assigner sa rente sur heritage valable, & luy fournir de declaration.

XXI.

Le seigneur n'est tenu faire veuë à son rentier foncier ou censier.

XXII.

Rentes sont indiuisibles.

DE CENS ET CHAMPARTS.
TIT. II.

I.



Le cens est diuifible.

II.

Le cens n'est requerable, ains rendable & portable.

III.

Droicts de cens, & du premier fonds de terre deus au seigneur direct, ne se perdent, ny par le temps, ny par decret.

IIII.

Lots & ventes appartiennent à celuy qui a la seigneurie la plus proche du fonds.

V.

En ventes d'heritages tenus à cens, soient pures & simples ou faculté de rachapt, par decret, ou autrement, & en baux à rente racheptable, sont deus lots & ventes deslors du contract.

VI.

Mais nō du cōtract de rachapt suiuant la faculté accordee.

VII.

Pour rentes foncieres non racheptables volontairement vendues ou delaissees par rachapt, sont deus lots & ventes, comme faisans, partie de l'heritage subiect à icelles.

VIII.

Pour adiudicatiō par decret fait pour nettoyer les hypotheques suiuant la conuention portee par le contract de vente ne sont deus lots & ventes : sinon entant que le prix d'icelle excéderoit celuy qui auoit esté conuenue.

IX.

En supplément de iuste prix, acquisition de plus-valuë, tranfaction portant delaissement d'heritages moyennant deniers baillez sont deuës ventes à raison de ce qui est payé, & non plus.

X.

Pour achapt de succession vniuerselle ne sont deus lots ne ventes.

XI.

Delicitation faicte entre coheritiers ou comperfonniers ne sont deus lots ne ventes.

XII.

Pour vente de fruiçts faicte a plus de dix ans, sont deus lots & ventes, & non pour vente faicte à vie.

XIII.

Qui tient terres subiectes à champart n'en peut leuer la desblée sans appeller le seigneur sur peine de l'amende.

XIIII.

Terres tenuës à champart, terrage, vinage, gros cens, ou rente originaire & directe tenant lieu de chef cens, doiuent lots & ventes au seigneur desdits champart, terrage, &c.

XV.

Terres tenuës en fief ne doiuent champart.

XVI.

Quand droict de relief est deu pour roture ou cotterie, il est coustumierement du double du cens ou de la rente.

XVII.

Vn seigneur soit censuel ou feudal n'est tenu en faifiner ny receuoir en foy le nouuel acquereur, s'il ne le satisfait aussi des anciens droicts & arrerages à luy deus.

XVIII.

Le seigneur censier peut tenir en sa main les terres vacantes, & en faire les fruiçts siens iusques à ce qu'il en soit recogneu.

XIX.

Mais pendant le temps de sa iouissance, ne luy sont deus cens ne rentes.

XX.

Qui ne paye son cens, doit perdre son champ, Qui est-ce que diēt nos Capitulaires, *Qui negligit censum, perdat agrum.*

DE FIEFS. TIT. III.

I.

Tous fiefs sont patrimoniaux, se peuvent vendre & engager sans le consentement du seigneur, & en sont les heritiers saisis.

II.

Les offices & benefices sont resignables, & à vies.

III.

Les charges & commissions reuocables à volonté.

IIII.

Tout nouveau vassal doit la foy à son seigneur, & luy en faire quelque recognoissance.

V.

Le doit aller trouver en son chef-lieu: là demander s'il y est ou autre pour luy ayant pouuoir de le recevoir en foy: puis mettant le genouil en terre, nuë teste, & sans espee, ny esperons, luy dire, qu'il luy porte la foy & hommage qu'il est tenu luy faire à cause du fief mouvant de luy, & à luy appartenant à tel tiltre: & le requérir qu'il luy plaise l'y recevoir.

VI.

Le vassal faisant la foy, doit mettre ses mains jointes entre celles de son seigneur, disant, Sire, ou, Monsieur ie devien vostre homme, vous promez foy & loyauté de ce iour en avant, viens en faisine vers vous, & comme à seigneur, vous offre ce. Et le seigneur luy doit respondre, ie vous reçois & prens à homme, & en nom de foy vous baise en la bouche, sauf mon droict & l'autrui.

VII.

Le seigneur n'est tenu recevoir l'hommage de son vassal, par procureur, s'il n'a excuse legitime: ny en autre lieu qu'en son fief.

VIII. Le vassal

Le vassal ne trouuant son seigneur en son hostel, doit heurter par trois fois à sa porte, l'appelleraussi par trois fois. Et apres auoir baisé la cliquette, ou verrouil d'icelle, faire pareille declaration que dessus, & en prendre acte authentique, signifié aux officiers de la iustice, ou au prochain voisin, & en laisser coppie.

IX.

Les enfans ne doiuent coustumierement que bouche & mains, auec le droict de Châbellage, qui est deu par tous.

X.

En quelques contrées la femme ne doit que la main: mais la courtoisie Françoisse doit aussi la bouche.

XI.

Droict de chambellage est vne piece d'or au chambellan du seigneur à la discretion du vassal.

XII.

Les collateraux doiuent relief ou rachapt.

XIII.

Relief est le reuenu d'une année, choisie en trois immédiatement precedentes; l'Edict des Pairs: ou vne somme de deniers pour vne fois, au choix du seigneur.

XIII.

Le vassal est tenu communiquer à son seigneur choisissant le relief ses papiers de recepte & terriers, & en bailler coppie aux despens du seigneur.

XV.

Au reuenu de l'année se doit rabatre le labourage.

XVI.

Si plusieurs rachapts escheent en vne année par contracts de vassaux, ils auront lieu si par leurs decés, n'en fera deu qu'un.

XVII.

Si durant l'année du rachapt s'en rencontre vn autre d'une terre hommee, qui tombe aussi en rachapt, le seigneur en iouira tant que l'année de son rachapt durera: & s'appelle rachapt rencontré.

En eschange & donation est deu rachapt.

XIX.

En vente de fief sont deus quints pour & au lieu de las-
sentement du seigneur : & en quelques lieux encores re-
quints : & en d'autres seulement treisiesme selon les con-
ventions ou coustumes des lieux.

XX.

Es lieux où est deu relief en toute mutation, comme au
Vvexin, ne sont deus droicts de quint, ou requint.

XXI.

Les quints & requints sont en montant: comme de cent
liures, xx. liures: & de xx. liures, iiij.

XXII.

En fiefs abonnés vëdus ne sont deus quints ny requints.

XXIII.

Si le seigneur n'est seruy de son fief, ny satisfait de ses
droicts, il le peut mettre en sa main par saisie, & en faire les
fruiçts siens.

XXIII.

Mais Tât que le Seigneur dort, le Vassal veille, & tât que
le Vassal dort le Seigneur veille.

XXV.

Le seigneur de fief ne plaide iamais deffaisy.

XXVI.

Est la saisie du seigneur preferee à tous autres.

XXVII.

Mais si les creanciers le satisfont de ses droicts, il sera te-
nu leur en faire main-leuee.

XXVIII.

Et pareillement donner souffrance aux tuteurs des mi-
neurs.

XXIX.

Il y a entre les prouerbes ruraux, que Souffrance à la fois
vaut des-heritance, qui semble estre ce qu'on dit coustu-
mierement, Souffrance vaut foy, tant qu'elle dure.

XXX.

Mineurs, ny leurs tuteurs n'entrent point en foy.

XXXI.

Mais bien les baillistres, qui font les fruiçts leurs, & les maris pour leurs femmes, & payent relief.

XXXII.

Aussi apres les bails finis, les maieurs & les femmes vefues y entrent comme de fief seruy, & sans payer autre relief.

XXXIII.

Qui demande souffrance doit declarer les noms & aages de ceux pour qui il la demande.

XXXIV.

Souffrance se doit aussi bailler à ceux qui par esloine legitime ne peuuent faire la foy en personne.

XXXV.

La souffrance finie l'on peut saisir à faute de foy.

XXXVI.

Vn nouveau seigneur peut sommer & contraindre ses vassaux de venir à la foy : qui est ce qu'on dit, A tous seigneurs tous honneurs.

XXXVII.

Mais l'ancien vassal ne doit que bouche & mains.

XXXVIII.

Quant vne faisie est faicte pour plusieurs causes, il suffit qu'elle se puisse soustenir pour l'une d'icelles.

XXXIX.

Vn seigneur peut receuoir à foy & relief tous ceux qui se presentent à luy, sauf tous droiçts.

Et n'est tenu de rendre ce qui luy est pource volontairement offert & présenté.

XL.

Si le vassal compose des droiçts de son fief saisy, & ne satisfait dans le temps qui luy auoit esté donné, la faisie se continuë. Qui est ce que diët quelques coustumes, Quant argent faut, finaison nulle.

XLI.

Le seigneur & le vassal sont tenus reciproquement se communiquer de bonne foy leurs adueus, denombrements & autres lettres, ou s'en purger par serment.

XLII.

Les droicts deus par le vassal à son Seigneur se payent selon la coustume du fief seruant: mais les foy & hommage se doiuent faire en la forme du fief dominant.

XLIII.

Le seigneur de fief peut aussi saisir à faute de denombrement non baillé.

XLIII.

Mais l'Adueu bien ou mal baillé sauue la leuée, & ne fait pas le seigneur les fruiets siens.

XLV.

Doit le seigneur leuer sa main de ce dōt il n'est en discord, la faisie tenant pour le surplus.

XLVI.

Denombrement baillé sert de confession contre celuy qui le baille: mais ne preiudicie à autrui: ny au seigneur qui le reçoit, sinon que le vassal estant retourné vers luy apres quarante iours pour le reblandir, il ne le blasme.

XLVII.

Vn seigneur ne peut contraindre son vassal de bailler adueu plus d'une fois en sa vie.

XLVIII.

Ce qui est recelé frauduleusement est acquis au seigneur.

XLIX.

Vn seigneur ne peut saisir le fief de son vassal, auant qu'il soit luy-mesmes entré en foy.

L.

Ne peut aussi gagner les fruiets du fief ouuert par le deceds de son vassal, qu'apres les xl. iours.

LI.

Le seigneur qui a receu son vassal en foy sans aucune re-

DES FIEFS.

feruation, ne peut faisir le fief pour les droicts par luy pretendus, ains y doit venir par action.

LII.

L'on doit aussi venir par action pour loyaux aydes.

LIII.

Loy aux aides sont coustumieremēt deus pour cheualerie de seigneur, ou de son fils aîné, pour mariage de fille aînée, pour rançon, & voyage en la terre Saincte.

LIIII.

Le cas de rançon est reïterable, les autres non.

LV.

Loyaux aydes sont presque ordinairement le doublage des debuoirs.

LVI.

Loyaux aydes ne passent aux filles, ores qu'elles soient Dames du fief.

LVII.

Par roturier & non noble, & à noble & non rorurier sont deus loyaux aydes.

LVIII.

Autrement pour la personne ne pert le fief sa noblesse.

LIX.

Auparauant que les fiefs fussent vrayement patrimoniaux, ils estoient indiuisibles & baillés à l'aîné.

LX.

Depuis les puisnez y ont pris quelques prouisions & appanages, qui leur ont quasi par tout esté en fin faicts patrimoniaux.

LXI.

L'aîné prenant tousiours quelque aduantage, selon la diuersité de Coustumes.

LXII.

Sur tout le chef-lieu, ou maistre manoir entier, ou au lieu d'iceluy le vol du chappon, qui est vn arpent de terre ou iardin.

Quand le fief confisteroit en vn hostel, il le prendroit entier luy seul, la legitime des autres sauue.

LXIIII.

Si les precloftures du chef-lieu excedent ce qui doit appartenir à l'aîné, il les peut auoir en recompensant ses puisnez en fiefs ou autres heritages de la mesme succession, à leur commodité.

LXV.

Et si peut auoir la plus belle terre entiere aux mesmes conditions.

LXVI.

Est ce droict d'ainesse en fiefs si fauorable que l'on n'en peut estre priué, ores qu'on y eust renoncé du viuant de ses pere & mere.

LXVII.

Par l'ordonnance du Roy Phillippes Auguste, du premier de May, de l'an 1210. (qui est par aduanture la premiere des Rois de la troisieme race) les parts de l'eclipsment du fief des maisnés est tenuë aussi noblement que le principal de son aîné.

LXVIII.

Mais il est en leur choix de releuer du seigneur feudal, ou les tenir en parage de leur aîné, qui les acquitte de la foy pour le tout enuers le seigneur commun.

LXIX.

Le frere n'acquitte sa sœur que de son premier mariage, & non des autres.

LXX.

Et en chacune branche de parage, celle qui s'appelloit miroüer de fief par l'ancienne coustume de Vucxin, pouoit porter la foy pour toutes les autres.

LXXI.

Si l'aîné de la fouche ou branche, est refusant ou dilayant faire la foy, le plus aagé d'apres, & les autres successiuelement la peuuent porter, & en ce faisant couvrir le fief.

LXXII.

Entre enfans n'y a qu'un droit d'aînesse.

LXXIII.

Presque par tout entre filles n'y a point de droit d'aînesse.

LXXIII.

Entre masles venans à succession en ligne collaterale n'y a gueres prerogative d'aînesse, fors du nom, du cry, & des armes.

LXXV.

En la mesme lignee, les masles excluënt les femelles estés en pareil degré, & venans de leur chef.

LXXVI.

Mais ils en sont exclus par elles s'ils estoient si esloignez, qu'ils fussent hors des degrez de representation.

LXXVII.

Si les femelles y viennent par representation d'un masle, elles concurrent avecques ceux qui sont en pareil degré que les representez.

LXXVIII.

Par la loy Salique les Royaume, Duchez, Comtés, Marquisats, & Baronies ne se desmembrent point.

LXXIX.

Mais doit le Roy appanage à messieurs ses freres, & enfans masles puisnez : & mariage à mesdames ses sœurs & filles : & les Ducs, Comtes, & Barons, recompense en autres terres.

LXXX.

Marque de Barõnie estoit avoir haute iustice en ressort.

LXXXI.

Le vassal peut demembrer, bailler a cens & arrentement son fief sans l'assens de son seigneur iusques au tiers de son domaine, sans s'en dessaisir, ou la main mettre au baston, que l'on dit, se iouer de son fief.

LXXXII.

Le seigneur qui a reüny à sa table le fief de son vassal n'est tenu en faire hommage à son seigneur : mais aduenant mutation de part ou d'autre, est tenu

de faire hommage du total, comme d'un fief vny.

LXXXIII.

Quand vn fief aduient par confiscation à vn haut iusticier, lequel n'est tenu de luy, ou vn arriere-fief tenu de luy, il en doit vider ses mains dans l'an & iour, ou en faire la foy & hommage au seigneur feudal.

LXXXIIII.

Le vassal est tenu aduoüer ou desaduoüer son seigneur, sinon qu'il y eust cōtentiō de tenure entre deux seigneurs, auquel cas il se peut faire receuoir par main souveraine du Roy.

LXXXV.

Le vassal mal desaduoüant pert son fief.

LXXXVI.

Car Qui fief denie, fief perd. Et qui à escient faict faux adueu, commet felonnie.

LXXXVII.

Fidelité & felonnie sont reciproques entre le seigneur & le vassal, & comme le fief se confisque par le vassal, ainsi la tenure feudale par le seigneur.

LXXXVIII.

Le seigneur reünissant le fief de son vassal par felonnie le tient franc & quitte de toutes debtes & charges constituées par son vassal.

LXXXIX.

Autrement le seigneur confisquant en est tenu iusques à la valeur de son fief.

XC.

Vn seigneur de paille, feurre, ou de beurre, vainct & mange vn vassal d'acier.

XCI.

On ne peut bastir forteresse, au fief & iustice d'autrui, sans son congé.

DE DONAIONS.

TIT. IIII.

I.

L n'est si bel acquest que de don.

II.

Toutesfois don d'heritage fait à celuy qui doit succeder, luy est propre iusques à la concurrence de ce qui luy deuoit aduenir.

III.

Don d'heritages faict pour nopces à faire, est reputé propre à celuy à qui il est faict: mais apres le mariage est reputé conquest.

IIII.

Simple transport ne saisit point.

V.

Donner & retenir ne vaut.

VI.

Promettre & tenir sont deux.

VII.

Il vaut mieux vn Tien, que deux, Tu l'auras.

VIII.

Chacun peut disposer de son bien à son plaisir par donation entre vifs.

IX.

Donation mutuelle soit entre vifs, soit par testament, ne se peut reuoquer que par mutuel consentement: sinon que celuy au profit duquel on auroit mutuellement testé, fust decédé.

X.

Donataire mutuel est tenu auancer les obseques & funerailles, & debtes du predecédé; mais non les laigs testamentaires.

XI.

Donaison faicte entre vifs par personnes malades dont ils decedent, est repute'e à cause de mort.

XII.

Donaison faicte à cause de mort ne faisir point.

DE RESPONSES. TIT. V.

I.



Qui respond paye.

II.

De foy, fy: de pleige plaid: de gage, reconfort: d'argent comptent, paix & accord.

III.

Qui respond pour vn criminel corps pour corps, auoir pour auoir, n'en est pourtant tenu que ciuilement.

DE PAYEMENTS. TIT. VI.

I.



Qui prester amy, au rendre ennemy.

II.

Qui bien veut payer, bien se veut obliger.

III.

Qui doit, il a le tort.

IIII.

Qui paye mal, paye deux fois.

V

Qui paye bien, deux fois emprunte.

VI.

Qui paye le dernier, paye bien.

VII.

C'est assez de payer vne fois ses debtes.

VIII.

Ce qui est differé, n'est pas perdu.

IX.

Or vault ce qu'or vaut.

X.

Qui veut faire cession doit confesser la debte.

XI.

L'on peut renoncer aux respits: mais non au benefice de cession.

XII.

Respits ou cession n'ont lieu en debtes priuilegees, ou procedans de dol ou de crime.

XIII.

Debtes priuilegees sont celles qui sont adiugees par sentences, loüages de maisons, moissons de grains en espee ou en argent, arrerages de cens & rentes foncieres, deniers dotaux, debtes de mineurs, aliments, & medicaments.

XIII.

En desconfiture tous creanciers viennent à contribution au sol la liure sur les meubles: & les chirographaires & sceduliers sur les immeubles.

XV.

Car sur les immeubles les premiers hypotecaires vont deuant.

XVI.

Desconfiture est quant le debteur fait rupture & faillite, ou qu'il y a apparence notoire que ses biens tant meubles qu'immeubles ne suffiront au payement de ses debtes.

XVII.

Le depost, le gage, la marchandise trouuee en nature dont le prix, qui se deuoit payer, est encores deu, ny autres debtes priuilegees ne sont tenus venir à contribution, ains ont droit de preference.

LIVRE V.
D' ACTIONS.

TIT. I.

I.

P Ar la Coustume generale de France tous adiournemens doibuent estre faicts a personne ou domicile.

II.

Adiournemens a trois briebs iours se font de trois iours en trois iours. Adiournemēts à trois iours frācs, de cinq en cinq iours. Et quant ils se font à huitaine, ou quinzaine, les premier & dernier iours ne sont contés que pour vn.

III.

Les choses vallent bien peu si elle ne vallent le demander.

IIII.

Pour peu de chose peu de plaid.

V.

Peu de chose est quant il n'est question que de dix liures.

VI.

Si vne demande ne passe 20. fols, iour de conseil n'en estoit octroyé.

VII.

Fautes vallent exploits.

VIII.

Qui prend guarentie, doit laisser son iuge, & l'aller prendre deuant celuy ou le plaid est.

IX.

Qui tire à garend, & garend n'a, sa cause perduë a.

X.

En Cour souueraine on plaide a toutes fins.

XI.

Le rescindant, & le rescifoire sont accumulables.

DE BARRES ET EXCEPTIONS.

TIT. II.

I.



Vi de barres se veut aider, doit commencer aux declinatoires, puis venir aux dilatoires, & finalement aux peremptoires: & si la derniere met deuant, nes'aidera des premieres.

II.

Reconuention n'a point de lieu, fors de la mesme chose dont le plaid est.

III.

Vne debte n'empesche point l'autre.

IIII.

Compensation n'a lieu si la debte qu'on veut compenser n'est liquide; & par escript.

V.

Voyes de nullité n'ont point de lieu.

VI.

Exception d'argent non nombré n'a point de lieu.

VII.

Exception de vice de litige n'a lieu.

VIII.

Maistre Gabriel de Marillac Aduocat du Roy fouloit dire. Qu'en France la peine du dol estoit extraordinaire, & executoire par corps.

DEPRESCRIPTIONS. TIT. III.

I.



Ens de mestier, & marchands vendans en detail ne peuuent demander leurs ouurages & marchandises apres six mois.

II.

Toutes actions d'iniures, de loüages de seruiteurs, de dommage de bestes, de payement de tailles, impôts, billets, guets, fourrages, foüages, vientrages, defaux & amendes, à faute d'auoir moulu ou cuit en moulins & fours ban-naux, sont tolluës par an & iour.

III.

Messire Pierre de Fontaines escript que barres ou exceptions de force, de peur, de tricherie, ne duroient qu'un an, par l'ancien vsage de la France.

IIII.

Aniourd'huy toutes rescisions de contractz faicts en minorité, ou autrement indeuëment, se doiuent intenter dedans dix ans de la minorité, ou du legitime empeschement cessant, suyuant les ordonnances des Rois Louys xij. & François I.

V.

Prescription d'heritage ou autre droict reel s'acquiert par iouissance de dix ans entre presens, & xx. ans contre absens aagez & non priuilegiez, avec tiltre de bonne foy: & sans tiltre par 30. ans.

VI.

Ceux qui sont demeurans en diuers bailliages Royaux, sont tenus pour absens.

VII.

Prescriptiõ de x.xx. ny de xxx. ans, ne court contre les pupils, ny en effect contre les mineurs, en estans releuez tout aussi-tost qu'ils le requierent.

VIII.

L'action personnelle ne se prescript que par xxx. ans.

IX.

L'action hypothecaire se prescript par vn tiers par dix ans entre presens, & vingt ans entre absens, avec tiltre & bonne foy, & sans tiltre par trente ans : & par le debteur ou son heritier, ou par vn creancier posterieur tant comme le debteur commun vit, par quarante ans.

X.

Toute prescription annale ou moindre coustumiere court contre les absens & mineurs sans esperance de restitution.

XI.

Contre l'Eglise n'y a prescription que de quarante ans par les ordōnances du Roy Charles le Grand, & de Louys son fils, conformement aux constitutions de leurs predecesseurs Empereurs.

XII.

En nouueaux acquests faicts par gens d'Eglise ils ne sont non plus priuilegez que les laigs.

XIII.

Si dedans l'an & iour de la ratification faicte de leur contract, ils ne sont fommez d'en vuider leurs mains, ils n'y peuuent plus estre contraincts.

XIII.

Et par trente ans ils en prescripuent l'indemnité, & le droict d'amortissement par cent ans.

XV.

Car contre le Roy n'y a prescription que de cent ans, Qui est ce qu'on dit communement, Qui a mágé l'oye du Roy, cent ans apres en rend la plume.

XVI.

Possession centenaire & immemoriale vaut tiltre.

XVII.

Possesseur de malefoy ne peut prescrire.

XIX.

Toutes les choses des Croisez sont en protection de saintes Eglise, & demeurent entieres & paisibles iusques à leur repaire, ou qu'on soit certain de leur mort.

XX.

En doüaire & autres actions qui ne sont encores nées, le temps de la prescription ne commence à courir que du iour que l'action est ouuerte.

XXI.

Entreprises qui se font dessus ou dessous rue publique ne se prescriuent iamais.

XXII.

Le vassal ne prescrit contre son seigneur, ny le seigneur contre son vassal.

XXIII.

Le cens & la directe sont aussi imprescriptibles.

XXIIII.

Mais ils se peuuent prescrire par vn seigneur contre l'autre par trente ans, & contre l'Eglise par quarante.

XXV.

Veües & esgousts n'acquierent point de prescription, sans tiltre.

XXVI.

Souffrance & accoustumance est desheritance.

XXVII.

En toutes choses indiuisibles l'interruption faicte contre l'un profite contre tous.

DE POS-

DE POSSESSION, SAISINE,
complainte ou cas de nouuelleté, sequestre,
recreance, & maintenue. TIT. IIII.

I.

Possession vaut moult en France.

II.

En toutes saisines, le possesseur est de meilleure condition, & pource *Qui possidet & contendit, Deum tentat & offendit.*

III.

Le viager conserue la possession du propriétaire.

IIII.

Tout possesseur de bonne foy faict les fruiets siens.

V.

Il ne prend saisine qui ne veut.

VI.

Apprehension de faict equipolle à saisine.

VII.

Deffaisine & saisine faicte en presence de notaires & de tesmoings vault, & equipolle à tradition & deliurance de possession.

VIII.

Toutesfois l'on ne peut acquerir vraye saisine en fief sans foy, ou assentement du seigneur.

IX.

Iouissance de dix ans vaut saisine.

X.

Qui à iouy par an & jour d'aucune chose reelle, ou droit immobilier, par loy, ou son predecesseur *non vi, non clam, non precario*, en a acquis la saisine & possession pour former complainte dans l'an & iour du trouble à luy faict.

I

XI.

En cas de nouuelleté se faut bien garder de dire qu'on ait esté spolié, mais simplement troublé, ou dejeté de sa possession par force.

XII.

Trouble s'entend non seulement par voye de faict, mais aussi par denegation iudiciaire.

XIII.

Au Roy ou à ses Baillifs & Seneschaux appartient par preuention la cognoissance des complaints de nouuelleté en chose prophane. Et priuatiuement à tous autres iuges, en matiere beneficiale, par recognoissancemesmes des Papes de Rome.

XIIII.

En complainte de nouuelleté y a amende enuers le Roy, & la partie.

XV.

Pour simples meubles on ne peut intenter complainte, mais en iceux eschet adueu & contre-adueu.

XVI.

Pour ce les executeurs de testament ne peuuent former complainte.

XVII.

Succession vniuerselle de meubles, & generalemēt toutes choses qui ont nature de droit vniuersel cheent en complainte.

XVIII.

Cessation, contradiction, & opposition valent trouble de faict.

XIX.

Cas sur cas, ou Main sur main, n'a point de lieu, ains se faut pouruoir par opposition.

XX.

L'on dit vulgairement qu'Entre le seigneur & subiect, ou vassal n'y a point de nouuelleté.

XXI.

De chose qui touche delict ne se peut dire aucun

enfaîné, & ne fait à ouyr en complainte, ne par vſage, ne par couſtume.

XXII.

Veüë a lieu en ſimple faiſine, mais non en cas de nouuelleté. Car l'Oppoſition que l'on y forme vaut veüë.

XXIII.

Qui chet en la nouuelleté, pour n'auoir iouy an & iour auparauant le trouble, peut intenter le cas de ſimple faiſine.

XXIII.

En ſimple faiſine ne ſe faiſt aucun reſtaſſement, ains vn ſimple adiournement: & n'y a lieu de recreance, ny ſequeſtre.

XXV.

Celuy qui verifie ſa iouiſſance par dix ans, ou la plus grande partie d'iceux auparauant l'an du trouble, recouure par le cas de ſimple faiſine la poſſeſſion qu'il auoit perduë.

XXVI.

En ſimple faiſine les vieux exploits vallent mieux: en cas de nouuelleté, les nouueaux ou modernes.

XXVII.

Car la recreances'adiuge à celuy qui prouue ſa derniere poſſeſſion par an & iour, & qui a le plus apparent droit.

XXVIII.

Si le recreancier pert la maintenuë, il doit rendre & reſtaſſer les fruiſts.

XXIX.

Quand les preuues des poſſeſſions ſont incertaines, ou y a crainte que l'on ne vienne aux mains, la complainte eſt fournie, Qui eſt à dire que les choſes contentieufes ſont ſequeſtreſ.

XXX.

Sequeſtre garde, & main de iuſtice ne defaiſit & ne preiudicie à perſonne.

DE PREUVES ET REPROCHES.

TIT. V.

I.



Ly a aux prouerbes ruraux, que Fol est qui se met
en enqueste.

II.

Ouïr dire va par ville, & En vn muy de cuider, n'y a
point plein poing de sçauoir.

III.

Seel authentique faict foy par les Coustumes.

III.

Tesmoings passent lettres.

V.

Les plus vieux tiltres ne sont pas les meilleurs.

VI.

Les fergens, messiers, & forestiers sont creus de leurs
prises & rapports iusques à cinq sols.

VII.

Vne fois n'est pas coustume.

VIII.

Coustume se doit verifier par deux tourbes, & chacune
d'icelles par dix tesmoins.

IX.

Reproches generaux ne sont admis, non plus que de
familier, amy, & seruiteur, s'il n'est domestique & ordinai-
re.

X.

Faiçts de reproches d'estre larron, parjure, infame, rauis-
seur, & autres crimes ne sont receus, s'il n'y a eu senten-
ce ou composition.

XI.

En grande pauureté n'y a pas grand' loyauté.

XII.

En matiere criminelle les reproches demeurent à l'arbitrage des iuges.

XIII.

Reprobatoires de reprobatoires ne sont receus.

LIVRE VI.

DE CRIMES ET GAGÉS
de bataille. TIT. I.

I.

EN demande de delict n'eschet iour de conseil.

II.

Voyes de faict sont defenduës.

III.

La volonté est reputée pour le faict.

IIII.

Tel cuide ferir qui tuë.

V.

Assez escorche qui le pied tient.

VI.

Il ne se donne plus treve ny paix entre les subiects du Roy: mais on les met en assurance & sauue-garde.

VII.

Sauue-garde n'est pas enfrainte par parole, mais par faict.

VIII.

Tous delicts sont personnels, & en crime n'y a point de garend.

Quis'enfuit, ou brise la prison estant du cas atteint, s'en rend coupable & quasi conuaincu.

Vn malade blessé ne se l'airra pas visiter au mire ou barbier, si celuy qui a faict le delict n'est prisonnier.

On ne peut tenir le corps & les biens.

Tout prisonnier se doit nourrir a ses despens s'il à de quoy : sinon le Roy ou le haut iusticier en crime, & pour debte ciuile, sa partie.

Tous vilains cas sont reniables.

L'on tient maintenant que le cas priuilegé attraiet à soy le delict commun : ce qui n'auoit point de lieu iadis.

L'on ne peut accuser vne femme d'adultere si son mary ne s'en plaint, ou qu'il en soit le maquereau.

Encores que nier ne soit larrecin, si est-ce de larrecin.

Pour larrecin n'eschet gaigne de bataille.

N'y pour autre crime ou il n'eschet peine de mort.

En faict de bataille le defendeur est tenu de confesser ou nier le fait dès le mesme iour qu'il reçoit le cartel.

L'appellé en combat a le choix des armes & de la forme du combat.

Personne ne'st tenu prendre, n'y bailler champion.

N'y de combattre auant l'an 21. de son aage.

XXIII.

Qui ne combat quant la bataille est assignée & iurée es mains du Prince, pert les armes, & est tenu pour vaincu.

XXIV.

Et si le demandeur ne rend le defendeur vaincu dans le soleil couché, le demandeur pert sa cause.

XXV.

Le d'esmentir & offre de combat fauve l'honneur à ce-luy qui est taxé de trahison.

XXVI.

Le mort à le tort, & le battu paye l'amende.

XXVII.

Maintenant toutes guerres & combats sont defendus, & n'y a que le Roy qui en puisse ordonner.

XXVIII.

La peine du vaincu estoit la mort, ou mutilation de membres, la loy de talion, ayant pour ce regard esté introduite par tout, par l'establissement du Roy Philippes Auguste, tant contre l'appellant que l'appelé.

DE PEINES ET AMENDES.

TIT. II.

I.

Es amendes, & peines nō coustumieres sont à l'arbitrage du Iuge.

II.

La peine de talion n'est point maintenant ordinaire en France.

III.

Toutes peines requierent declaration.

III.

Le fait Iuge l'homme.

V.

Qui fait la faute, il la boit.

VI.

Par compagnie on se fait pendre.

VII.

Pour faisie brisee y a amende de soixante sols.

VIII.

Qui brise vne franchise brise toutes les autres.

IX.

Infraction de sauuegarde & d'asseurance iurée par la coustume de France merite la hart.

X.

Feu M^{rs}ieur Marillac Aduocat du Roy souloit dire, que tout dol meritoit punition extraordinaire, ores qu'il fust traicté en matiere ciuile.

XI.

Toutefois les peines sont arbitraires.

XII.

M^{rs}ieur Pierre de Fontaines escript que les actions penales n'ont point de lieu, & qu'on fait rendre les choses sans plus avec l'amende au Seigneur. Qui est ce qu'on dit: A tout meffaiet n'eschet qu'amende.

XIII.

La longueur de la prison emporte vne partie de la peine & ne confisque point les biens, ores que la punition en fust perpetuelle.

XIV.

Iamais on n'aduance les verges d'ont on est battu.

XV.

La peine du foüet infame.

XVI.

Il n'est pas foüetté qui veut. Et qui ne peut payer en argent, le paye en son corps.

XVII.

L'homme qui se met a mort par desespoir confisque envers son Seigneur.

XVIII.

Le corps du desesperé est potté à la Iustice comme conuaincu & condamné.

XIX. Qui

XIX.

Qui confisque le corps, confisque les biens.

XX.

La confiscation des meubles appartient au seigneur duquel le confisqué est couchant & leuant, & des immeubles aux seigneurs iusticiers des lieux où ils sont assis.

XXI.

Sinon que ce fust pour crime de leze Majesté, ou le Roy prend tout: ou de fief, auquel le seigneur prend ce qui est en son fief, ores qu'il n'eust iustice.

XXII.

Crimes feudaux sont felonnie, ou faux adueu à escient.

XXIII.

L'homme condamné aux galaires, ou banny à perpétuité, ou à plus de dix ans confisque tous ses biens, & ne peut succeder.

XXIII.

Le seigneur iouïra des biens appartenans par vusufruit à son subiect condamné, tant que le condamné viura.

XXV.

Pour le meffait de l'homme, ne perdent la femme ny les enfans leurs doüaire & autres biens.

XXVI.

Ni elle sa part des meubles & acquests de son mary, par l'aduis de Maistre Charles du Moulin, fuiuy contre les anciennes coustumes de la France.

XXVII.

Femme mariee condamnée, ne confisque que ses propres, & non la part qu'elle auroit aux meubles & acquests.

XXVIII.

En crimes qui meritent la mort, le vilain sera pendu, & le noble decapité.

XXIX.

Toutesfois où le noble seroit conuaincu d'un vilain cas, il sera puny comme vilain.

XXX.

L'on disoit communément Que les nobles payent soixante liures d'amende, où les non nobles payent lx. sols.

Mais en crimes, les vilains sont plus griefuement punis que les Nobles.

XXXIII.

Et où le vilain perdrait la vie ou vn mēbre de son corps, le noble perdra l'honneur & responce en Court.

XXXIIII.

De toutes amendes estans en loyles femmes n'en doivent que la moitié.

XXXV.

Mais les iniures faictes aux fēmes se punissent au double.

XXXVI.

La plus grād peine & amēde attire & emporte la moindre.

DE IUGEMENTS. TIT. III.

I.



L plaide bel, qui plaide sans partie.

II.

Les cautions iudiciaires n'ont point de lieu entre les François.

III.

Messire Pierre de Fontaines dit Que nostre vsage ne faisoit rendre aucuns despens de plaid : ce qui estoit aussi porté par vne ancienne ordōnance du Roy saint Louys : mais au lieu de ce y auoit amende aux hommes & à la Cour, & vne peine de la dixiesme partie de la chose controuersee, iusques à ce que par l'ordonnance du Roy Charles iiij. dit le Bel: l'on a pratiqué le *vicus victori*, du pays de droit escrit, & la peine dessusdite esté abolie.

IIII.

Comme depuis l'amende du fol appel a esté introduite par l'ordonnance du Roy François I. contre ceux du mesme pays.

V.

Le Roy, & les seigneurs en leurs iustices, y plaident par leurs Procureurs.

VI.

Et n'y payent aucuns despens, ny n'en reçoivent.

VII.

Deffaut ne se donne contre le Procureur du Roy.

VIII.

L'on souloit dire, De l'hōme mort, le plaid est mort: mais cela a esté corrigé par les arrests, & l'ordonnance de l'an 539.

IX.

En petitoire ne gist prouision.

X.

Au rapport des iurez foy doit estre adjoustee en ce qui est de leur art, s'il n'en est demandé amandement.

XI.

Les iuges doiuent iuger certainement, & selon les choses allegues & prouues.

XII.

Sage est le iuge qui escoute, & tard iuge. Car de fol iuge, brietue sentence.

XIII.

Necessité n'a point de loy.

XIIII.

Par le droit ancien de la France, le coustumax perdoit sa cause bonne ou mauuaise, ciuile ou criminelle. Aujour-d'huy il faut iustifier sa demande.

XV.

Erreur de calcul ne passe iamais en force de chose iugee.

XVI.

J'ay souuent ouy dire à feu Monsieur l'Aduocat du Mesnil, Que les belles offres faisoient perdre les beaux procez.

XVII.

Et à feu M. Bruslard President aux Enquestes, Qu'au iugement d'un vieil procès, il se falloir contenter de ce qui s'y trouuoit sans y rechercher ou interloquer d'auantage.

Vne voix n'empesche point partage.
XVIII.

En matiere criminelle n'y a partage: ains passe le Iugement à la plus douce opinion.

DES APPELLATIONS.

TIT. IIII.

I.

Es Sentences ne se peuvent reformer que par appel, & non par nullités alleguées contre icelles.

II.

Les appellations sont personnelles.

III.

Par la coustume du Royaume on deuoit appeller illico, autrement on n'y estoit iamais reçu.

IIII.

Les Iuges Royaux dont est appel ne peuvent estre prins à partie, s'il n'y a dol, fraude, ou concussion.

V.

Les Iuges non Royaux sont tenus de soustenir leur Iugé au peril de l'amende sur eux, ou leur Seigneur.

VI.

Ceux qui ont failly en fait & en droit l'amendent aussi à la discretion de la Court.

VII.

En cause d'appel es pays Coustumiers on ne se pouuoit accorder sans lettres du Roy.

VIII.

Le vilain ne pouuoit fausser le Iugement de son Seigneur mais par l'Establissement de la Court de Pairs toutes appellations s'y peuvent releuer.

IX.

Toutes appellations ont effect suspensif & deuolutif, sinon que par l'ordonnance les iugemeẽts soient executoires nonobstant oppositions ou appellations quelconques.

X.

Si celuy qui est donné tuteur en appellé, il ne laisse d'en estre chargé pendant l'appel.

XI.

Les appellations comme d'abus ont lieu quand il y a cõtrauention ou entreprise contre les saincts decrets, libertez del'Eglise Gallicane, Arrests des Cours souueraines, iurisdiction seculiere ou Ecclesiastique. Et tient on qu'elles sont de l'inuention de Messire Pierre de Cugnieres.

XII.

Le iuge d'appel execute le iugemẽt par luy donné ou confirmé.

D'EXECUTIONS, ET DECRETS.

TIT. V.

I.



On ne commence iamais par execution ou faïse, si ce n'est en vertu d'un contract garātigie, iugement, ou chose priuilegiée. Car voyes de faïct, sont defendues.

II.

Et si n'eschet prouision, en ce qui seroit irreparable.

III.

Le mort execute le vif: & non le vif, le mort: Qui est à dire Que tout droit d'execution s'esteint avec la personne de l'obligé & condamné.

IIII.

Par coustume & vsance gardee en Cour laye garnison de main se faïct es mains du sergent porteur de lettres passees sous seel Royal, nonobstant npposition: voire nonobstant l'appel, par l'ordon. du Roy Charles viij. de l'an 1484.

V. Let-

Lettres vne fois grossoyees, ne peuuent estre regrossoyees sans appeller la partie, & ordonnance de iustice.

Lettres Royaux & commissions ne sont valables, ny les iugemenes executaires, apres l'an & iour.

Toutesfois prise de corps ne se suranne point, & s'execute nonobstant toutes appellations.

De Presles & de Marcueil tiennent que celuy qui peut estre arresté par loy & priuilege de ville, est tenu d'y eslire domicile.

Le Roy ne plaide iamais deffaisy.

Saisie sur saisie ne vaut.

Les saisies sont annales, ou pour le plus triennales.

Vn sergent est creu du contenu en son exploit.

Toute cognoissance de cause luy est defendue.

Vn decret adiugé, vaut des heritance.

Vn decret nettoye toutes hypotheques & droicts, fors les censuels & feudaux.

Le poursuivant crie n'est garend de rien fors des solemnitez d'icelles.

L'on se peut opposer sur le prix entre l'adiudication & le scellé.

Tout acheteur, gardien, & depositaire des biens de iustice, & obligé pour chose iudiciaire, est contrainable par corps, sans qu'il puisse estre attermoyé, ny receu à faire cession.

Toutes debtes du Roy sont payables par corps.

Rebuffe dit que l'on tient pour reigle en France, ce que plusieurs Coustumes diēt, Que respits, ni cessions de biens, n'ot lieu en dete deniee & adiugee, loüage de maisōs, moissons de grains, debtes de mineurs contre leurs tuteurs, vi-tuailles, seruice de mercenaires, & condamnation d'intérest procedant par delict, & quelques autres.

DE TAILLES ET CORVEES. TIT. VI.

I.

Les tailles sont personnelles, & s'imposent au lieu du domicile, le fort portant le foible.

II.

Le domicile s'acquiert par an & iour: & se préd au lieu où l'on couche & leue au iour saint Remy.

III.

Qui n'a ne peut, & où il n'y a que prendre, le Roy pert son droit.

IIII.

Besoing ou necessité n'a loy.

V.

Les collecteurs ne doiuent estre tenus de faire le mauuais bon.

VI.

Coruees à volōté sont limitees à douze l'annee, se doiuent faire d'un Soleil à l'autre: n'en peut-on prendre plus de trois en un mois, & en diuerfes sepmaines.

VII.

Noble n'est tenu de payer taille, ny faire viles coruees à son seigneur: mais le seruir en la guerre, & autres actes de noblesse.

VIII.

Coruees se doiuent faire aux despens de ceux qui les doiuent.

IX.

Coruees, tailles & questes n'ont point de suite, ne tombent en arrerages, & ne peunent estre vendus ny transportez à autrui.

X.

En assiette de terre, coruee de vilain n'est point rien comptee.

Rebutte de que l'on tient pour reigle en France, ce que
plusieurs coutumes disent. Que les personnes de biens
n'ont rien de dévotion & aduocé, loings de maris, moi-
sons de grains, de bestes de mœurs contre leurs mœurs, vi-
gnales, service de mœurs, & conuention d'inte-
rêt précédant par de l'ist, & de l'ist de l'ist.

DETAILED ET CORNEES. VII.

I.

Les personnes de biens, & les personnes de biens
du domicile, le domicile, le domicile.

II.

Le domicile, le domicile, le domicile, le domicile, le domicile
au lieu où on couche & le lieu où on couche.

III.

Quand on peut, & on peut, & on peut, & on peut, & on peut
le domicile, le domicile, le domicile, le domicile, le domicile.

IV.

Le domicile, le domicile, le domicile, le domicile, le domicile
le domicile, le domicile, le domicile, le domicile, le domicile.

V.

Le domicile, le domicile, le domicile, le domicile, le domicile
le domicile, le domicile, le domicile, le domicile, le domicile.

VI.

Le domicile, le domicile, le domicile, le domicile, le domicile
le domicile, le domicile, le domicile, le domicile, le domicile.

VII.

Le domicile, le domicile, le domicile, le domicile, le domicile
le domicile, le domicile, le domicile, le domicile, le domicile.

VIII.


Le domicile, le domicile, le domicile, le domicile, le domicile
le domicile, le domicile, le domicile, le domicile, le domicile.


IX.


Le domicile, le domicile, le domicile, le domicile, le domicile
le domicile, le domicile, le domicile, le domicile, le domicile.


X.

Le domicile, le domicile, le domicile, le domicile, le domicile
le domicile, le domicile, le domicile, le domicile, le domicile.











INVENTAIRE
11625-
F 11626